

ও রাজনীতিক ক্ষেত্রে এই শিক্ষাকে গান্ধীজি প্রয়োগ করেছিলেন। বাইবেলের বাণীও তাঁকে প্রভাবিত করেছে। যীশুর 'সারমন্ অন্ দি মাউন্ট' এর শিক্ষা তাঁকে বিশেষভাবে অনুপ্রাণিত করেছে।

ড. শশীভূষণ দাসগুপ্তের মতানুসারে টলস্টয়, রাস্কিন, থোরো, ম্যাৎসিনি, কার্পেন্টার প্রমুখ বিভিন্ন চিন্তাবিদেদের লেখা থেকে গান্ধীজি অনুপ্রেরণা পেয়েছেন। আত্মজীবনীতে গান্ধীজি স্বীকার করেছেন : “আধুনিক জগতের তিনজন আমার জীবনের উপর গভীর ছাপ অঙ্কিত করিয়াছেন। রায়চন্দ্র ভাই তাঁহার জীবন্ত সংসর্গ দ্বারা, টলস্টয় তাঁহার ‘বৈকুণ্ঠ তোমার হৃদয়ে’ (Kingdom of God is Within You) নামক পুস্তকের দ্বারা এবং জন রাস্কিন তাঁহার ‘আনটু দিস্ লাস্ট’ নামক পুস্তকের দ্বারা আমাকে বিস্মিত ও মুগ্ধ করিয়াছেন।” জন রাস্কিন (John Ruskin)-এর Unto This Last বইটি তাঁকে বিশেষভাবে প্রভাবিত করেছে। রাস্কিনের কাছ থেকে পাওয়া গান্ধীজির তিনটি মূল শিক্ষা হল : (১) সমষ্টির কল্যাণের মধ্যেই ব্যক্তির কল্যাণ বর্তমান ;

রাস্কিন, টলস্টয়,
থোরো প্রমুখ মনীষীর
প্রভাব

(২) একজন আইনজীবী ও একজন ক্ষৌরকারের শ্রমের মূল্য সমান ;
এবং (৩) শ্রমজীবীদের জীবনই হল আদর্শ জীবন। টলস্টয়ের অহিংসা
নীতির দ্বারা গান্ধীজি বিশেষভাবে প্রভাবিত হয়েছেন। টলস্টয়ের বাণী ও
শিক্ষার দ্বারা অনুপ্রাণিত হয়ে তিনি অহিংস উপায়ে শাসকের অন্যায়-

অবিচারের বিরুদ্ধে প্রতিবাদ ও প্রতিকারের কথা বলেছেন। টলস্টয়ের ‘বৈকুণ্ঠ তোমার হৃদয়ে’ পুস্তকটি গান্ধীজিকে অভিভূত করেছে। তিনি ‘আত্মজীবনী’-তে বলেছেন : “Tolstoy is one of the three moderners who have exerted the greatest spiritual influence on my life.” মার্কিন নৈরাজ্যবাদী দার্শনিক থোরো (David Thoreau)-র *An Essay on Civil Disobedience* শীর্ষক রচনাটিও গান্ধীজিকে বিশেষভাবে প্রভাবিত করে। অনেকে মনে করেন গান্ধীজি তাঁর সত্যগ্রহের ধারণা থোরোর কাছ থেকে পেয়েছেন। কিন্তু এ কথা ঠিক নয়। তবে ভারতে গান্ধীজি যখন অসহযোগ আন্দোলন শুরু করেন তখন থোরোর বইটির বক্তব্যের দ্বারা অনুপ্রাণিত হয়ে থাকতে পারেন। খ্রীস্টান নৈরাজ্যবাদী টলস্টয়ের কাছ থেকে গান্ধীজি এই শিক্ষা নিয়েছিলেন যে, শান্তিপূর্ণ পথে সকল সমস্যার সমাধান সম্ভব। গান্ধীজির রাজনৈতিক দর্শনের মৌলিক দিকগুলির পরিচয় পাওয়া যায় তাঁর বিভিন্ন বক্তৃতা এবং ‘Harijan’, ‘Young India’ প্রভৃতি পত্র-পত্রিকায় প্রকাশিত বিভিন্ন প্রবন্ধের মাধ্যমে।

৪.৩. গান্ধীজির অহিংসা নীতি (Gandhi's Concept of Non-Violence)

গান্ধীজি ছিলেন সামগ্রিকভাবে সত্যগ্রহী। সত্যগ্রহী হিসাবে তিনি ছিলেন অহিংসা নীতির অনুগামী। মানব সভ্যতার ইতিহাসের ক্রমবিবর্তনের ধারা থেকে গান্ধীজি অহিংসার গতি ও উদ্দেশ্যের সন্ধান পেয়েছেন। মানবজাতির ইতিহাসের ধারা পর্যালোচনা করে তিনি প্রতিপন্ন করেছেন যে, মানুষ হিংসা পরিত্যাগ করে ক্রমশঃ অহিংসার পথে অগ্রসর হয়েছে। মানব ইতিহাসের এই অহিংস গতিধারা সম্পর্কিত গান্ধীজির বিচার-বিশ্লেষণের পিছনে সনাতন হিন্দুধর্মের ঐতিহ্য ; গভীর ঈশ্বরবিশ্বাস ; সততা, নৈতিকতা প্রভৃতি মানবিক গুণাবলীর সদর্থক ক্রিয়া অনস্বীকার্য। অধ্যাপক ড. বিশ্বনাথ প্রসাদ ভার্মা (V. P. Varma) তাঁর *Modern Indian Political Thought* শীর্ষক গ্রন্থে মন্তব্য করেছেন : “He (Gandhi) interpreted history in the terms of the progressive indication of the superiority of Ahimsa.” অহিংসা গান্ধীদর্শনের মূলমন্ত্র। মহাত্মা গান্ধী সারা জীবন ধরে অহিংসার মতকে অবলম্বন করে এগিয়ে গেছেন। তিনি বলেছেন : “Non-violence is the first article of my faith. It is also the last article of my creed.”

মানব ইতিহাসের
অহিংস গতিধারা

গান্ধীজির মতানুসারে অহিংসা অন্যায়ের সঙ্গে সম্পর্ক-রহিত এবং দুর্বলতার সঙ্গে দূরত্বযুক্ত। অহিংসা হল বীরোচিত আত্মার স্থিরসঙ্কল্প শক্তির অটল অভিব্যক্তি। অহিংসা হল চূড়ান্ত নৈতিক ও আধ্যাত্মিক শক্তির প্রতীক। অধ্যাপক ড. ভার্মা বিষয়টি ব্যাখ্যা করতে গিয়ে বলেছেন : “Ahimsa was the farthest removed from acquiescence in evil or from a false masquerade for one’s weakness. It was demonstration of the resolute strength of the heroic soul which refuses to hurt anybody because every living creature is essentially spirit and fundamentally one with himself. It is the symbol of supreme moral and spiritual strength. Meticulous care for the right of the least among us is the *sine qua non* of non-violence.” অহিংসা দুর্বলতা নয়, বীরের শক্তি। প্রকৃত অহিংসা হল একটি প্রবল শক্তি। অহিংসার এই শক্তিকে অতিমাত্রায় শক্তিদ্রের সরকারের বিরুদ্ধেও সাফল্যের সঙ্গে ব্যবহার করা যায়। অহিংসাকে দুর্বলের অসামর্থ্য হিসাবে অবজ্ঞা করা অসঙ্গত। অহিংসা হল মানুষের সর্বোত্তম শক্তি।

গান্ধীজির অভিমত অনুযায়ী অহিংসা নিছক একটি নেতিবাচক ধারণা নয়। অন্য জনের প্রতি হিংস্র আচরণ বা ক্ষতি সাধন থেকে বিরত থাকা বা সংযমী আচরণই অহিংসা নয়। অহিংসার মধ্যে কোন রকম তিক্ততা, স্বার্থপরতা বা অহংবোধ থাকে না। অহিংসা হল সম্পূর্ণ একটি সদর্থক ধারণা। প্রেম, সৎচিন্তা, অপরিগ্রহের মধ্যে অহিংসার ইতিবাচক অভিব্যক্তি ঘটে। অসৎ চিন্তা পরিহার, মিথ্যাচার ও ছল-চাতুরি বর্জন, প্রাণশক্তির বিকাশ প্রভৃতির মধ্যেই আছে অহিংসার নীতি। অধ্যাপক ড. ভার্মা (V. P. Varma) তাঁর *Political Philosophy of Mahatma Gandhi and Sarvodaya* শীর্ষক গ্রন্থে অহিংসার ধারণা মন্তব্য করেছেন : Ahimsa is not merely the negative act of refraining from doing offence, injury or harm to others, but really it represents the ancient law of positive self-sacrifice and constructive suffering.” অহিংসা হল পারস্পরিক ভালবাসা ও সম্প্রীতির এক বন্ধন। মানবিক কাজকর্মের মধ্যে অহিংসার অভিব্যক্তি ঘটে প্রেম-ভালবাসা ও সম্প্রীতি-সম্ভাবের ব্যাপক বিকাশের মাধ্যমে। সমাজনীতির ভিত্তিতে নিরন্তর প্রেম-প্ৰীতি, মননশীলতা ও অধ্যবসায়কে সুনিশ্চিত করার মধ্যে গান্ধীজি অহিংসার অনুসন্ধানের কথা বলেছেন। গান্ধীজি অহিংসার মধ্যেই সামাজিক ন্যায়ের সন্ধান পেয়েছেন। অহিংসার মধ্যেই প্রেম-প্ৰীতি এবং স্বাধীনতা ও সমতার নীতি বর্তমান।

মহাত্মা গান্ধীর মতানুসারে সত্য এবং অহিংসা পরস্পরের সঙ্গে ওতপ্রোতভাবে সম্পর্কযুক্ত। অধ্যাপক ড. ভার্মা বলেছেন : “Gandhi considered truth and non-violence to be absolutely binding.” মহাত্মার মতানুসারে সত্যের মধ্যে অহিংসা আছে এবং অহিংসার মধ্যে সত্য আছে। গান্ধীজির কাছে সত্যই ভগবান। অহিংসাই গান্ধীজির ভগবান, সত্যই তাঁর ভগবান। অহিংসাই সত্য এবং সত্যই অহিংসা এবং সত্য ও অহিংসা উভয়ই হল তাঁর ঈশ্বর। অহিংসা হল গান্ধীজির কাছে পরম ধর্ম, সত্য ও সনাতন। সত্যের জন্য সত্যাত্মেয়ীকে সকল রকম দুর্ভোগের মুখোমুখি হতে হয়। অহিংসা বলতে অসীম ভালবাসাকে বোঝায়। এবং ভালবাসা বলতে দুঃখ-যন্ত্রণা ভোগের অসীম সামর্থ্যকে বোঝায়। মহাত্মার মতানুসারে সত্যগ্রহীকে অহিংসার মাধ্যমে সত্য উপলব্ধির জন্য নিরন্তর ও অক্লান্তভাবে উদ্যোগী হতে হবে। একমাত্র অহিংস পথে সত্যানুদান ও সত্যের উপলব্ধি সম্ভব। গান্ধীজির অভিমত অনুযায়ী দেহ, ক্ষমতা ও অর্থের মোহ বড় নয়। তিনি মোক্ষের আনন্দকেই বড় করে দেখিয়েছেন। এবং এই মোক্ষের আনন্দ লাভ অহিংস সত্যগ্রহের পথেই সম্ভব। অধ্যাপক ড. ভার্মা (V. P. Varma) তাঁর *Political Philosophy of Mahatma Gandhi*

and Sarvodaya শীর্ষক গ্রন্থে বলেছেন : “Ahimsa is vitally integrated with Truth of God....The social application of ahimsa is postulated upon the acceptance of spiritual metaphysics and the implied necessity of the growth of social charity. The law of love and respect for life, if courageously practised is bound to lead to the elevation of the accent, quality and character of politics and civilisation.”

গান্ধীজির অভিমত অনুযায়ী অহিংসা কাপুরুষতা ও ভীৰুতার সঙ্গে সম্পর্ক-রহিত। বরং বলা ভাল যে অহিংসা ভীৰুতার বিরোধী। কাপুরুষ ও ভীৰু ব্যক্তি অহিংস পথের পথিক হতে পারে না। সত্যাশ্রয়ী ও সাহসী ব্যক্তিই অহিংসার সাধনা করতে পারেন। অন্যের পক্ষে অসম্ভব।
 অহিংসার মধ্যে ভয় নেই
 ভয়ে ভীত মানুষ অহিংস নীতি অনুসরণ করতে অক্ষম। যিনি সত্যাশ্রয়ী ও সাহসী, তিনি বিপদে বিচলিত হন না, ভয়কে জয় করতে পারেন, অহিংস পথে যাবতীয় প্রতিকূলতার মোকাবিলা করতে পারেন। নির্ভয় মানুষের মন অহিংস হতে পারে। ভীত মানুষ অহিংস হতে পারে না। প্রতিরক্ষা ও নিরাপত্তার কথা বলতে গিয়ে গান্ধীজি বলেছেন যে অহিংস প্রতিরোধই হল সর্বোৎকৃষ্ট। ভয়ে ভীত হয়ে আনুগত্য প্রদর্শনকে তিনি নিকৃষ্ট বলেছেন। এর থেকে তিনি বরং হিংসাত্মক প্রতিরোধকে উপরে স্থান দিয়েছেন।

অহিংসার পথ ও নীতি নিয়ে গান্ধীজি নিরন্তর পরীক্ষা-নিরীক্ষা চালিয়ে গেছেন। মানব কল্যাণের ধারণা এবং ন্যায়ের প্রেরণা এ ক্ষেত্রে তাঁকে অনুপ্রাণিত করেছে। অহিংসা নিয়ে এই
 অহিংস শিক্ষার প্রয়োজন
 পরীক্ষা-নিরীক্ষার মধ্যে নিহিত আছে গান্ধীজির সত্যানুসন্ধান ও আত্মানুসন্ধান। মহাত্মার অহিংসা দর্শনের মধ্যে শ্রমের মর্যাদার কথাও আছে। এ প্রসঙ্গে তিনি অহিংসা শিক্ষার কর্মসূচীর কথাও বলেছেন। গান্ধীজি শিশুর অহিংসবোধের বিকাশের স্বার্থে সহায়ক শিক্ষা ব্যবস্থা চালু করার কথা বলেছেন। তেমনি আবার শিশুর সামাজিক বিকাশের উদ্দেশ্যে তিনি সমাজকেন্দ্রিক শিক্ষার প্রয়োজনীয়তার কথা বলেছেন।

গান্ধীজি বিশ্বাস করতেন যে, সম্পূর্ণ অহিংসা অসম্ভব। পরিপূর্ণ অহিংসা দৈহিক অস্তিত্বের দুনিয়ায় সম্ভব হতে পারে না। মহাত্মার মতানুসারে অহিংসার বৃহত্তর স্বার্থে অনেক সময় হিংসার প্রয়োজনীয়তা প্রতিপন্ন হতে পারে এবং হয়ও। এ প্রসঙ্গ আলোচনা
 অহিংসা আপেক্ষিক ধারণা
 প্রসঙ্গে তিনি বলেছেন যে, জীবন রক্ষা করার জন্য, সুস্বাস্থ্য সুনিশ্চিত করার জন্য, খাদ্য সংগ্রহ করার জন্য আঘাত, মৃত্যু ও ধ্বংসের প্রয়োজনীয়তা প্রতীয়মান হয়। এতদসত্ত্বেও গান্ধীজি মানুষকে অহিংসা ও সত্যের জন্য সতত সচেতন হতে ও থাকতে বলেছেন। মহাত্মা গান্ধী আপেক্ষিক ধারণা হিসাবে অহিংসার উপর গুরুত্ব আরোপ করেছেন।

গৌতম বুদ্ধ বা মহাবীরের মত গান্ধী অহিংসাকে ব্যক্তিগত উদ্দেশ্যমূলক বিষয় বা কর্ম হিসাবে বিবেচনা করেন নি। গান্ধীজি অহিংসাকে জনসাধারণের কাজকর্মের সফল কার্যপ্রক্রিয়া হিসাবে গণ্য করেছেন। অধ্যাপক ড. ভার্মা (V. P. Varma) তাঁর *Political Philosophy of Mahatma Gandhi and Sarvodaya* শীর্ষক গ্রন্থে এ বিষয়ে মন্তব্য করেছেন : “Gandhi's greatness as a leader and a thinker lay in his transformation of the individualistic message of non-violence into a successful technique of direct man action.” গান্ধীজির বক্তব্যের মাধ্যমে অহিংসার দ্বিবিধ ব্যঞ্জনা প্রতিপন্ন হয়। মহাত্মা গান্ধী ব্যক্তিগত ও প্রাতিষ্ঠানিক পর্যায়ে অহিংসার আদর্শের কথা বলেছেন। হিংসাত্মক ক্রিয়াকলাপ

যেমন ব্যক্তিগত ও প্রাতিষ্ঠানিক পর্যায়ে সংঘটিত হতে পারে এবং হয়, তেমনি অহিংসার আদর্শ ব্যক্তিগত ও প্রাতিষ্ঠানিক পর্যায়ে হওয়া দরকার।

গান্ধীজির অহিংসা নীতির বৈশিষ্ট্য (Characteristics of Gandhi's Concept of Non-violence)

অহিংসা সম্পর্কিত মহাত্মা গান্ধীর ধারণা পর্যালোচনা করলে কতকগুলি মৌলিক বৈশিষ্ট্যের পরিচয় পাওয়া যায়। অহিংসার গান্ধীবাদী ধারণার এই বৈশিষ্ট্যগুলি সম্পর্কে অবহিত হওয়া আবশ্যিক।

(১) আক্ষরিক অর্থে অহিংসা বলতে অপরের প্রতি হিংসা না করা বা অন্যের ক্ষতি না করাকে বোঝায়। কিন্তু এ হল অহিংসার সংকীর্ণ অর্থ। কিন্তু ব্যাপক অর্থে অহিংসা নেতিবাচক নয়, ইতিবাচক। ব্যাপক ও ইতিবাচক অর্থে অহিংসা হল অপরের কল্যাণ সাধন করা। অহিংসার উদ্দেশ্য হল প্রতিপক্ষকে ভালবাসা এবং ভালবেসে তাঁর হৃদয় জয় করা। এ হল সকলের জন্য সক্রিয়ভাবে কল্যাণ কামনা।

(২) অহিংসা দুর্বলের হাতিয়ার নয়, এ হল সবলের অস্ত্র। ভীত ব্যক্তির জীবনের ঝুঁকি নেয় না। তাই ভীত ব্যক্তিরাই সাধারণত হাতে অস্ত্র তুলে নেয়। সাহসী ব্যক্তিরাই অহিংসার আদর্শের অনুগামী হতে পারে। যে সব ব্যক্তি অন্যের জীবন নিতে উদ্যত তাদের হাতেই অহিংস ব্যক্তি নিজের জীবনকে ছেড়ে দিয়ে নিশ্চিত থাকে। অহিংস দর্শন অনুযায়ী, ব্যক্তি তার জীবনকে যতই অন্যের হাতে ছেড়ে রাখে ততই তার জীবনের নিরাপত্তা বৃদ্ধি পায়।

(৩) অহিংসা হল সভ্য মানুষের হাতিয়ার, হিংসা অসভ্য মানুষের। হিংসা হল পশুশক্তির প্রকাশ। অপরদিকে অহিংসা হল আধ্যাত্মিক শক্তি বা আত্মিক শক্তির অভিব্যক্তি।

(৪) আধ্যাত্মিক চেতনাসম্পন্ন ধার্মিক মানুষের কাছে অহিংসার আদর্শ হল ঈশ্বরীয় নির্দেশ।

(৫) হিংসা ডেকে আনে হিংসা, ঘৃণা ডেকে আনে ঘৃণা। হিংসা প্রতিহিংসার জন্ম দেয়। অহিংসা দিয়েই এই ক্রিয়া-প্রতিক্রিয়ার সমাপ্তি ঘটান সম্ভব। অহিংসা নীতির মাধ্যমে মানুষের বিবেকের কাছে এবং সুকুমার বৃত্তিসমূহের কাছে আবেদন জানান হয়। ব্যক্তির ইচ্ছার বিরুদ্ধে ব্যক্তির উপর কোন রকম চাপ সৃষ্টি করা হয় না। এইভাবে প্রতিপক্ষের মর্যাদা ও স্বাধীনতার প্রতি সম্মান প্রদর্শন করা হয়।

(৬) অহিংসা হল প্রেম-প্রীতির প্রকাশ। স্বভাবতই অহিংসা হিংসার থেকে উন্নত। অহিংস আদর্শের অনুগামী ব্যক্তি প্রতিপক্ষের উপর শাস্তিমূলক কষ্ট চাপিয়ে না দিয়ে, নিজের কাঁধেই তা টেনে নেয়। অহিংসা হল আত্মোৎসর্গমূলক ভাববাসার অভিব্যক্তি। এই কারণে বিবদমান উভয় পক্ষের কাছেই অহিংসা নীতির অনুসরণ অভিপ্রেত। উভয় পক্ষই অহিংসা নীতির অনুগামী হয়ে নৈতিক ও মানসিক উভয় দিক থেকে লাভবান হয়।

(৭) কোন একটি কাজ অহিংস নাকি সহিংস প্রকৃতির তা পর্যালোচনার ক্ষেত্রে সংশ্লিষ্ট ক্রিয়া এবং তার উদ্দেশ্য অনুধাবন করা আবশ্যিক। সাধারণভাবে অহিংসা বলতে বোঝায় কাউকে আঘাত বা কারোর কোন ক্ষয়-ক্ষতি না করা। কিন্তু মহাত্মা গান্ধীর মতানুসারে কোন একটি জীবের নিরাময়ের অযোগ্য অসহনীয় যন্ত্রণা ও কষ্টের অবসানের জন্য জীবটির জীবনহানির প্রয়োজন দেখা দিতে পারে। কোন একটি জীবের যে রোগ-যন্ত্রণার মর্মান্তিক কষ্টের নিরাময় মানুষের সাধ্যের অতীত গান্ধীজি সেক্ষেত্রে হত্যা করার বিধানকে অনুমোদন করেছেন। তিনি হত্যাকাণ্ডকে হিংসা হিসাবে না দেখে অসহনীয় রোগ-যন্ত্রণার অবসান হিসাবে প্রতিপন্ন করার পক্ষপাতী।

(৮) অহিংসা-নীতি অনুসারে মানুষকে হিংসামূলক আচরণ থেকে বিরত থাকতে বলা হয়েছে। তবে ক্ষেত্রবিশেষে অহিংসা নীতির স্বার্থে হিংসামূলক আচরণের আশ্রয় নিতে হতে

পারে। অহিংসার বৃহত্তর স্বার্থে অনেক সময় হিংসা আসতে পারে এবং আসে। অহিংসা বলতে কখনই কোন ক্ষেত্রে আঘাত করা বা মৃত্যু ঘটান যাবে না, এমন কথা গান্ধীজি বলেন নি। নিজের জীবন রক্ষা ও খাদ্য আহরণের জন্য আঘাত করার বা মৃত্যু ঘটাবার প্রয়োজন দেখা দিতে পারে। জীবন বাঁচানোর জন্য বিষধর সাপ বা পাগলা কুকুরের মৃত্যু ঘটান ; আবার খাদ্যশস্য ধ্বংসকারী প্রাণীর মৃত্যু ঘটান অহিংসবিরোধী আচরণ নয়। তেমনি আবার আশ্রয়প্রার্থীর জীবন রক্ষার উদ্দেশ্যে অনন্যোপায় হয়ে আক্রমণকারীর বিরুদ্ধে হিংসামূলক আচরণের আশ্রয় নিতে হতে পারে। নিজের জীবন ও মর্যাদা রক্ষার অধিকার ও কর্তব্য প্রত্যেক মানুষেরই আছে। কোন দেশ বা জাতির ক্ষেত্রেও এ কথা সমভাবে সত্য। সাম্রাজ্যবাদী বিদেশী আক্রমণকারীর বিরুদ্ধে অস্ত্রধারণের অধিকার ও কর্তব্য প্রত্যেক দেশ ও জাতির আছে।

(১৯) অহিংসা হল হিংসাকে পরিত্যাগ করার প্রচেষ্টা। মানুষের সুস্থ সমাজজীবনের স্বার্থে এটা অপরিহার্য। তবে অহিংসার আচরণ হবে স্বতঃস্ফূর্ত, সমবেদনায়ুক্ত এবং সতত সকলের কল্যাণের উদ্দেশ্যে পরিচালিত।

গান্ধীজির অহিংসা নীতির সমালোচনা (Criticism of Gandhi's Concept of Nonviolence) :

মহাত্মা গান্ধীর অহিংসা নীতি সমালোচনার উর্ধ্বে নয়। সমালোচকরা বিভিন্ন দিক থেকে এই নীতির সীমাবদ্ধতার প্রতি দৃষ্টি আকর্ষণ করেছেন। বিরূপ সমালোচনা প্রসঙ্গে বিরুদ্ধবাদীরা বিভিন্ন যুক্তির অবতারণা করেন।

(ক) সাধারণভাবে মানুষের জীবনধারার বিভিন্ন দিক গান্ধীজির অহিংসা নীতির অন্তর্ভুক্ত। অহিংসা তত্ত্বটি সাধারণ বিচারে সর্বব্যাপক। এতদসত্ত্বেও নীতিটির একটি গুরুত্বপূর্ণ সীমাবদ্ধতা অনস্বীকার্য। সমাজের সকলে ধর্মানুরাগী বা ঈশ্বরবিশ্বাসী নয়। মানবসমাজের একটি উল্লেখযোগ্য অংশ নিরীশ্বরবাদী। মার্কসবাদীরা ধর্মকে আমজনতার কাছে আফিম হিসাবে গণ্য করেন। তাঁরা ঈশ্বরের অস্তিত্বে অবিশ্বাসী। মানুষকে তাঁরা ধর্মের ঘানি থেকে মুক্ত করার পক্ষপাতী। সুতরাং ঈশ্বরের অস্তিত্বে অবিশ্বাসী মানুষের কাছে অহিংসা তত্ত্বের কোন আবেদন নেই।

(খ) মহাত্মা গান্ধীর অহিংস নীতি অতিমাত্রায় আধ্যাত্মিক প্রকৃতির। রূঢ় বাস্তবের রাজনীতিক ক্ষেত্রে গান্ধীজির অহিংসা নীতির প্রাসঙ্গিকতা প্রসঙ্গে সন্দেহের অবকাশ আছে। বাস্তব রাজনীতিতে হিংসাত্মক কাজকর্ম প্রায়শই প্রাসঙ্গিক প্রতিপন্ন হয়। স্বভাবতই রাজনীতিক ক্ষেত্রে অহিংসা নীতির প্রয়োগযোগ্যতা প্রসঙ্গে বিতর্ক দেখা দেয়। বলা হয় যে বাস্তব রাজনীতিতে হব্‌স ও মেকিয়াভেলির নীতিই অধিকতর কার্যকরী প্রতিপন্ন হয়। এ বিষয়ে দ্বিমতের অবকাশ নেই। তবে রাজনীতির তাত্ত্বিক ক্ষেত্রে গান্ধীজির অহিংসা নীতি অনেকাংশে অর্থবহ প্রতিপন্ন হয়। এবং অহিংসা নীতিকে সীমাবদ্ধ ক্ষেত্রে অনুসরণ করা সম্ভব।

(গ) বিরুদ্ধবাদীদের অভিযোগ অনুযায়ী আন্তর্জাতিক রাজনীতিতে অহিংসা নীতি অপ্রাসঙ্গিক ও অর্থহীন প্রতিপন্ন হয়। তবে মহাত্মা গান্ধী দাবি করেছেন যে জাতীয় তথা আন্তর্জাতিক রাজনীতিতে অহিংসা নীতি সমভাবে প্রাসঙ্গিক ও অর্থবহ।

অহিংসা নীতির প্রথম উত্থাপক বা উদ্ভাবক হিসাবে মহাত্মা গান্ধীর নাম করা যায় না। প্রাচীন ভারতের ধর্মগুরুরা অনেক আগেই সামাজিক ও রাজনীতিক ক্ষেত্রে অহিংসা নীতির আদর্শ প্রচার করেছেন। গান্ধীজি নিজেই স্বীকার করেছেন যে ভারতভূমিতে

উপসংহার

অহিংসার আদর্শ পর্বতের মতই প্রাচীন। প্রাচীন ভারতের ইতিহাসের পাতা থেকে গান্ধীজি অহিংসা নীতির ধারণাকে তুলে এনেছেন। গান্ধীজি অহিংসা নীতিকে তাঁর জীবনধারার মূল ভিত্তি হিসাবে গ্রহণ করেছিলেন। তিনি অহিংসা নীতিকে সমকালীন মানবসমাজের প্রয়োজন পূরণের এক কার্যকর হাতিয়ারে পরিণত করেছিলেন। বাস্তব রাজনীতির

প্রকৃতিগত পরিবর্তন বা সংস্কার সাধনের ক্ষেত্রে গান্ধীজি অহিংসা নীতির উপর বিশেষ গুরুত্ব আরোপ করেছিলেন। এবং অহিংসা নীতিকে তিনি সামাজিক ও রাজনীতিক একটি প্রক্রিয়ায় পরিণত করেছিলেন। এর মধ্যেই মহাত্মার মহত্ত্ব ও কৃতিত্ব নিহিত আছে।

৪.৪. গান্ধীজির সত্যগ্রহ নীতি (Gandhi's Concept of Satyagraha)

ভারতীয় রাষ্ট্রচিন্তার আলোচনায় মহাত্মা গান্ধীর সত্যগ্রহ দর্শনের সদর্থক অবদানের গুরুত্ব অনস্বীকার্য। গান্ধীজির কাছে সত্যগ্রহ তত্ত্ব হল সুসংহত জীবনদর্শন। ব্যক্তিকে তিনি সমাজমুখী ও সত্যগ্রহী করে তোলার পক্ষপাতী ছিলেন। ব্যক্তির আত্মসুখ ও অহংসর্বস্বতার তিনি বিরোধিতা করেছেন। ব্যক্তিমানুষের গণতান্ত্রিক চেতনা ও সামাজিক ব্যক্তিত্বের বিকাশের জন্য তিনি বিবেক, আত্মশুদ্ধি, আত্মসমালোচনা ও প্রতিবাদ প্রভৃতি গুণাবলীর উপর গুরুত্ব সত্যগ্রহ তত্ত্ব গুরুত্বপূর্ণ আরোপ করেছেন। সত্যগ্রহের মাধ্যমে মহাত্মা গান্ধী মানুষকে নিষ্কলুষ এবং সৎ ও সমাজসচেতন করে তুলতে চেয়েছেন। তাঁর সত্যগ্রহ দর্শন ব্যক্তিস্বাতন্ত্র্যবাদীদের উদারনীতিক ও উপযোগিতাবাদী দর্শনকে অতিক্রম করে গেছে। সত্যগ্রহের রাজনীতিতে গান্ধীজি নীতিকে উচ্চাসন প্রদান করেছেন। তিনি সত্যগ্রহের আদর্শ ব্যাপকভাবে ব্যাখ্যা ও প্রচার করেছেন 'ইন্ডিয়ান ওপিনিয়ন'-এ। গান্ধীজি দক্ষিণ আফ্রিকার ট্রান্সভালে সত্যগ্রহ সমিতির মাধ্যমে সাফল্যের সঙ্গে সত্যগ্রহের আদর্শকে বাস্তবে প্রয়োগের ব্যবস্থা করেছেন। সত্যগ্রহ তত্ত্বের চরম পরীক্ষা হয়েছে ভারতে মহাত্মা গান্ধীর নেতৃত্বে ঔপনিবেশিকতাবাদ বিরোধী বিভিন্ন সংগ্রামে এবং সর্বমতীর 'সত্যগ্রহ আশ্রমে'।

টলস্টয়ের অহিংসা ও প্রেমের বাণী, গীতার নিকাম কর্ম, খ্রীস্টের সত্য ও মানবতার আদর্শ, মহম্মদের সহজ-সরল জীবনদর্শন প্রভৃতি গান্ধীজিকে সত্যগ্রহের আদর্শের প্রতি আকৃষ্ট করেছে। 'সর্বোচ্চ সুখ লাভের জন্য মানুষকে সমবায় ও সেবাকার্যে নিজেকে নিবেদন করতে হবে'—রাস্কিনের এই তত্ত্ব গান্ধীজিকে বিশেষভাবে প্রভাবিত করেছে। সমবায় ও সমষ্টি উন্নয়নের আদর্শের দ্বারা মহাত্মা গান্ধী অনুপ্রাণিত হয়েছেন। তিনি দক্ষিণ আফ্রিকার ফিনিক্স নামক জায়গায় সর্বপ্রথম এক সমবায়িক সমাজ গড়ে তোলেন।

সত্যগ্রহের সাধনার সূত্রপাত ঘটেছে এই সমবায়িক সমাজে। দক্ষিণ আফ্রিকার জোহেন্সবার্গে টলস্টয়ের প্রেম ও অহিংসার আদর্শে 'টলস্টয় ফার্ম' গড়ে তোলা হয়। এই ফার্মে গান্ধীজি সাফল্যের সঙ্গে সত্যগ্রহের আদর্শ ও তত্ত্বের উপর পরীক্ষা-নিরীক্ষা চালিয়েছেন। সত্যগ্রহ দর্শনের শৃঙ্খলা ও নিষ্ঠা এবং প্রেম ও অহিংসার আদর্শ গান্ধীজি নিজে শিখেছেন এবং মানবজাতিকে শিখিয়েছেন নিজের জীবনের বাস্তব অভিজ্ঞতার ভিত্তিতে। এই অভিজ্ঞতা তিনি অর্জন করেছেন দক্ষিণ আফ্রিকায় প্রাপ্ত আঘাত, সমবায় জীবন ও জেল জীবন সূত্রে।

গান্ধীজির অহিংসা নীতির মত সত্যগ্রহের ধারণা ব্যাপকভাবে অর্থবহ। সত্যগ্রহ হল সত্যের জন্য নৈতিক চাপ সৃষ্টি। মহাত্মা গান্ধীর মতানুসারে অহিংস পথে সত্যের উপলব্ধির জন্য সত্যগ্রহীকে সতত সক্রিয় থাকতে হবে। সত্যগ্রহীর পক্ষে এটা অপরিহার্য ও আবশ্যিক। গান্ধীজি সত্যকে চূড়ান্ত বাস্তব হিসাবে গণ্য করেছেন। সুতরাং সত্যগ্রহীকে সত্যের উপর যাবতীয় আক্রমণকে সর্বপ্রকারে প্রতিহত করতে হবে।

সত্যগ্রহ হল এক সুসংহত জীবনদর্শন। সত্যগ্রহ হল সত্যানুসারে সমবেত এক সমবায়িক উদ্যোগ। এ হল এক সত্যদর্শন। সত্যগ্রহ হল অন্যায়ের বিরুদ্ধে প্রতিরোধ। কিন্তু এই প্রতিরোধ বাহ্যিক কোন শক্তি দিয়ে নয়, এই প্রতিরোধ আত্মিক শক্তি দিয়ে। এই প্রতিরোধ অস্ত্র দিয়ে নয়, প্রেম দিয়ে। বাহুবল বা পশুশক্তি নয়, মানুষের প্রতি শ্রদ্ধা-ভক্তিই হল সত্যগ্রহীর শক্তি। সত্যগ্রহীর মধ্যে সৈন্যের সকল গুণ বর্তমান থাকবে ; কিন্তু হিংসা বা ঘৃণা থাকবে না। সত্যগ্রহ হল সত্যের জন্য আত্মোৎসর্গ। সত্যগ্রহীর মধ্যে ধন-সম্পত্তিতে আসক্তি থাকবে না। দারিদ্র্য

সত্ত্বেও সত্যগ্রহী হবে নিভীক। সে হবে সৎ ও উন্নত মনের অধিকারী। অনিষ্টকারী ইচ্ছা বা ঘৃণা-প্রবঞ্চনা থাকবে না, থাকবে সামগ্রিক প্রেম-প্রীতি। সত্যের সন্ধানে সত্যগ্রহী নিজের দৃষ্টি-ভঙ্গির সঙ্গে অপর সকলের দৃষ্টিভঙ্গিকে সংযুক্ত করবে। সত্যগ্রহী খোলা মন নিয়ে চলবে, অপরকে জানবে ও অপরের প্রতি আন্তরিক হবে এবং অপরের বিশ্বাসভাজন হবে। সত্যগ্রহ হল এক সংগ্রাম। এই সংগ্রাম ক্রোধ-হিংসা বিদেহ বর্জিত। এই সংগ্রাম হল সত্য ও ন্যায়ের জন্য। এ হল প্রতিপক্ষের প্রতি প্রেম-প্রীতির মানসিকতা নিয়ে প্রতিপক্ষকে জয় করার সংগ্রাম।

সত্যগ্রহের ধারণা এই সংগ্রামের পিছনে আছে আধ্যাত্মিক উৎকর্ষ লাভের বাসনা। এই সংগ্রাম সুখ-দুঃখ বর্জিত। এর মধ্যে জয়-পরাজয়ের ভাবনা বা আশংকা নেই। সত্যগ্রহীর সংগ্রামে অস্ত্রবল, বাহুবল বা পশুশক্তির ব্যবহার নেই, আছে অন্যায়ের মুখোমুখি দৃঢ় মানসিক ও আত্মিক শক্তি। সত্যগ্রহ দুর্বলের আত্মপ্রবঞ্চনা নয়, সংগ্রাম থেকে সরে পড়া নয়, এ হল মানসিক ও আত্মিক শক্তিসহ অন্যায়ের মুখোমুখি হওয়া। মানবিক নীতির উপর প্রতিষ্ঠিত অধিকারকে বা ন্যায্য অধিকারকে সাহসের সঙ্গে সংরক্ষণ করতে হবে। সুখ-দুঃখ, ক্রোধ-ঘৃণা, বিদেহ প্রভৃতিকে বিসর্জন দিয়ে সত্যগ্রহীর উদ্দেশ্য হবে প্রতিপক্ষকে ন্যায় ও সত্যের পক্ষে নিয়ে আসা। সত্যগ্রহী দৃঢ় মনোবল নিয়ে নৈতিক বাঁচার সংগ্রামের সামিল হবে। সে শুদ্ধ মনের নির্দেশে পরিচালিত হবে। সত্যগ্রহী আঘাত পেলে তা সহ্য করবে, প্রত্যাঘাত করবে না। সত্যগ্রহী হবে আত্মসংযমী ও সত্যনিষ্ঠ এবং অহিংসা ও ক্ষমার জীবন্ত প্রতীক। মহাত্মা গান্ধীর সত্যগ্রহের ধারণা ব্যাখ্যা করতে গিয়ে অধ্যাপক ড. বিশ্বনাথ প্রসাদ ভার্মা (V. P. Varma) তাঁর *Political Philosophy of Mahatma Gandhi and Sarvodaya* শীর্ষক গ্রন্থে বলেছেন : “It signifies a genuine, intense and sincere quest for truth which is God. I mean an assertion of the power of the human soul against political and economic domination. Satyagraha is the indication of the glory of the human conscienceConscience reinforces the battle for victory of the social good. Satyagraha is based on the invincible belief in the ultimate triumph of divine justice and right.”

সত্যগ্রহ নিষ্ক্রিয় প্রতিরোধ নয়। কারণ নিষ্ক্রিয় প্রতিরোধের মধ্যে থাকে প্রতিপক্ষকে পরাজিত করার আকাঙ্ক্ষা, থাকে পশুশক্তি প্রয়োগের মানসিকতা। তাছাড়া নিষ্ক্রিয় প্রতিরোধকারীও প্রতিপক্ষকে বিপন্ন ও বিপর্যস্ত দেখতে চায় এবং এর মধ্যে তার আনন্দানুভূতি বর্তমান থাকে। কিন্তু সত্যগ্রহের মধ্যে প্রতিহিংসা চরিতার্থ করার কোন রকম বাসনা থাকে না, থাকে না অরাজকতা সৃষ্টি করার কোন অভিপ্রায়। মহাত্মা গান্ধী বলেছেন : “Satyagraha differs from passive resistance as North Pole from the South Pole. The latter has been conceived as a weapon of the weak and does not exclude the use of physical force or violence for the purpose

সত্যগ্রহের অর্থ

of gaining one's end, whereas the former has been conceived as the weapon of the strongest and excludes the use of violence in any shape or form.” সত্যগ্রহ মানেই আইন অমান্য করা নয়। বরং এ হল প্রয়োজন হলে অম্লান বদনে দুঃখ-দণ্ড ভোগের প্রস্তুতি বা সম্মতি। সত্যগ্রহ হল মানসিক দৃঢ়তা সহকারে সামনে এগিয়ে চলা এবং প্রতিপক্ষকে ন্যায় ও সত্যের পক্ষে পরিবর্তিত করা। সত্যগ্রহের আদর্শ হিসাবে যে সমস্ত গুণাবলীর উপর গুরুত্ব আরোপ করা হয়, সেগুলি হল : প্রেম-প্রীতি, স্বৈর্য-সংযম, ক্ষমা-উদারতা, আত্মশক্তি ও আত্মার মুক্তি প্রভৃতি। সত্যগ্রহের প্রথম পরীক্ষা হল ব্রহ্মচর্য ও আত্মনির্ভরশীলতা। দ্বিতীয় পরীক্ষা হল সত্য ও ন্যায়ের পথে এগিয়ে যাওয়ার সাহস। সত্যগ্রহের চরম পরীক্ষা হিসাবে বলা হয়েছে কর্তব্যের খাতিরে নির্ভয়ে দৃঢ়তার সঙ্গে দাঁড়ান, অহিংস পথে

অন্যায়ের প্রতিরোধ, দুঃখ-যন্ত্রণার ঝুঁকি নিয়ে মানসিক শক্তি সহকারে সত্য ও ন্যায়ের জন্য সংগ্রামের সামিল হওয়া, সংগ্রাম থেকে সরে পড়া বা আত্মপ্রবঞ্চনা নয় প্রভৃতি। সত্যগ্রহের ধারণা ব্যক্ত করতে গিয়ে গান্ধীজি বলেছেন : “Satyagraha is literally holding on to truth, and it means, therefore, and is known as, soul force.”,

মহাত্মা গান্ধীর সত্যগ্রহ দর্শন পর্যালোচনা করলে এর কতকগুলি বৈশিষ্ট্যের পরিচয় পাওয়া যায়। সত্যগ্রহ তত্ত্বের এই বৈশিষ্ট্যগুলি সম্পর্কে অবহিত হওয়া আবশ্যিক।

(ক) সত্যগ্রহ হল এক আত্মিক শক্তি। সকল রকম অন্যায়-অত্যাচারের বিরুদ্ধে এই আত্মিক শক্তির সক্রিয় ভূমিকার কথা বলা হয়। সত্যগ্রহীর মধ্যে প্রতিপক্ষের প্রতি হিংসা-দ্বेष বা বিদ্বেষের মনোভাব থাকে না। কারণ সত্যগ্রহ তত্ত্বে প্রতিপক্ষের উপর আত্মিক শক্তি বলপ্রয়োগের পরিবর্তে প্রতিপক্ষকে পরিবর্তিত করার কথা বলা হয়। সত্যগ্রহীর অহিংস প্রতিরোধ প্রতিপক্ষের হৃদয়কে নাড়া দেয়। সত্যগ্রহ দর্শনে প্রেম-ভালবাসার মাধ্যমে হৃদয় পরিবর্তনের প্রক্রিয়ার উপর জোর দেওয়া হয়।

(খ) সত্যগ্রহ হল ব্যক্তির জন্মগত অধিকারের মত। কিন্তু সত্যগ্রহের আদর্শ অনুসরণের জন্য ব্যক্তি-মানুষের জীবনধারার আত্মশৃঙ্খলা যেমন দরকার, তেমনি দরকার যাবতীয় দুঃখযন্ত্রণা সহ্য করার প্রস্তুতি ও ক্ষমতা।

(গ) বিভিন্ন পথে ও পদ্ধতিতে সত্যগ্রহের আদর্শকে অনুসরণ করা যায়। কিন্তু সত্যগ্রহের সকল উপায়-পদ্ধতির মূল ভিত্তি হবে অহিংসার আদর্শ। সত্যগ্রহ অনুশীলনের উপায়-পদ্ধতির মধ্যে উল্লেখযোগ্য হল প্রতীকী বা আমরণ অনশন, অসহযোগ আন্দোলন, অহিংসার আদর্শ আইন অমান্য আন্দোলন, ধরনা, ধর্মঘট, বিদেশী দ্রব্যসামগ্রী বটকট, সরকারী অনুষ্ঠান বয়কট, সম্মানসূচক উপাধি ও পদ প্রত্যাখ্যান প্রভৃতি।

(ঘ) নিষ্ক্রিয় প্রতিরোধ ও সত্যগ্রহ সমার্থক নয়। সত্যগ্রহের সঙ্গে নির্মল হৃদয় সংযুক্ত থাকে। এবং সামাজিক, রাজনৈতিক, আর্থনৈতিক প্রভৃতি সকল ক্ষেত্রেই সত্যগ্রহের আদর্শ অনুসরণ করা যায়। কিন্তু নিষ্ক্রিয় প্রতিরোধের ক্ষেত্রে পরিস্থিতি পৃথক। নিষ্ক্রিয় প্রতিরোধের ক্ষেত্রে নির্মল ও নিষ্কলুষ হৃদয়ের অপরিহার্যতার কথা বলা হয় না। নিষ্ক্রিয় প্রতিরোধ হল শত্রুপক্ষের মোকাবিলা করার একটি হাতিয়ার এবং একমাত্র রাজনৈতিক ক্ষেত্রে এই হাতিয়ার প্রয়োগের প্রয়োজনীয়তার কথা বলা হয়।

(ঙ) সত্যগ্রহ হল শক্তিমানের অস্ত্র ; হীনবলের হাতের হাতিয়ার নয়। সত্যগ্রহের মধ্যে হিংসা ও ভীড়তার কোন স্থান নেই। গান্ধীজি ভীড়তাকে কোনভাবেই স্বীকার বা সমর্থন করেন নি। বরং কাপুরুষতা ও হিংস্রতার মধ্যে তিনি হিংস্রতার পক্ষ অবলম্বনের পক্ষপাতী। অন্যায়-অবিচারের নীরব দর্শক হয়ে থাকা এবং সত্যের উপর অসত্যের কর্তৃত্ব কায়েম হওয়া সত্যগ্রহের বিরোধী।

(চ) সত্যগ্রহ সূত্রে দ্বিবিধ সুবিধা পাওয়া যায়। সত্যগ্রহের মাধ্যমে বাদী ও বিবাদী, নিপীড়ক ও নিপীড়িত উভয়ের কল্যাণ সাধিত হয়।

গান্ধীজির সত্যগ্রহ নীতির সমালোচনা (Criticism of Gandhi's Concept of Satyagraha)

গান্ধীজির সত্যগ্রহ তত্ত্বও বিরোধ-বিতর্কের উর্ধ্বে নয়। সমালোচকরা সত্যগ্রহ দর্শনেরও সীমাবদ্ধতার প্রতি দৃষ্টি আকর্ষণ করেন। সত্যগ্রহ নীতির বিরূপ সমালোচনা প্রসঙ্গে বিভিন্ন যুক্তি অবতারণা করা হয়। সি. এম. কেস (C. M. Case) তাঁর *Non-Violent Coercion : A Study in Methods of Social Pressure* শীর্ষক গ্রন্থে এ বিষয়ে বিস্তারিতভাবে আলোচনা করেছেন।

(১) সি. এম. কেসের অভিমত অনুযায়ী সত্যগ্রহের বিভিন্ন উপায়-পদ্ধতি বাস্তবে বলপ্রয়োগ হিসাবে প্রতিপন্ন হয়। কারণ সত্যগ্রহের বিভিন্ন উপায়-পদ্ধতির মাধ্যমে সত্যগ্রহী প্রতিপক্ষকে উভয় সঙ্কটের সম্মুখীন করে। প্রতিপক্ষ প্রবল মানসিক চাপের মধ্যে পড়ে যায়। প্রতিপক্ষের প্রতিকূল পরিস্থিতির পরিচয় দিতে গিয়ে সি. এম. কেস বলেছেন : “Neither of the alternatives appeals to his desires or his judgement, yet he is compelled by the situation to choose between them.” প্রতিপক্ষের উপর এ ধরনের এক উভয় সংকটমূলক পরিস্থিতি চাপিয়ে দেওয়া বাস্তবে এক ধরনের বলপ্রয়োগ হিসাবে প্রতীয়মান হয়।

(২) মহাত্মা গান্ধীর সত্যগ্রহ দর্শন অহিংসা নীতির উপর প্রতিষ্ঠিত। গান্ধীজি যে-কোন রকম বলপ্রয়োগের বিরোধিতা করেছেন। কিন্তু সত্যগ্রহীর আচরণ প্রতিপক্ষকে এমন এক অবস্থার অধীন করে যে, প্রতিপক্ষ নিজেই নিপীড়িত ভাবতে থাকে। বিবদমান উভয় পক্ষ সত্য ও আত্মিক শক্তির ভিত্তিতে ন্যায় প্রতিষ্ঠার স্বার্থে সত্যগ্রহের পথে যদি পরস্পরের মুখোমুখি হয়, তাহলে এক অভিনব জটিল অবস্থার উদ্ভব হয়। এ রকম অবস্থার ব্যাখ্যা-বিশ্লেষণ মহাত্মা গান্ধীর সত্যগ্রহ তত্ত্বে পাওয়া যায় না। সমালোচকদের অভিমত অনুসারে সত্যগ্রহের পন্থা-পদ্ধতি হল প্রতিপক্ষের উপর প্রবল চাপ সৃষ্টির এক অভিনব কৌশল বিশেষ।

(৩) মহাত্মা গান্ধীর সত্যগ্রহ দর্শনে দৃঢ় আত্মনিয়ন্ত্রণের কথা বলা হয়। তা ছাড়া মানুষের সমুন্নত নৈতিক বিকাশ, সত্য ও ন্যায়ের জন্য আত্মকষ্ট সহ্য করার ক্ষমতা, উদ্দেশ্যে উপনীত হওয়ার জন্য সুসংহত উদ্যোগ প্রভৃতির উপর গুরুত্ব আরোপ করা হয়। এই সমস্ত কারণে সত্যগ্রহ মতবাদ তাত্ত্বিক বিচারে অতি উন্নত মানের। এ বিষয়ে বড় একটা বিরোধ-বিতর্ক নেই। কিন্তু বাস্তব বিচারে মতবাদটি অতিমাত্রায় আদর্শবাদী। এ কথা অস্বীকার করা যাবে না।

(৪) গান্ধীজির সত্যগ্রহ তত্ত্ব অনুরূপভাবে আবার অতিমাত্রায় আধ্যাত্মিক বা অধিবিদ্যক প্রকৃতির। স্বভাবতই সত্যগ্রহ দর্শনের বিভিন্ন ব্যঞ্জনা বা অভিব্যক্তি সকলের কাছে সম্যকভাবে অনুধাবনযোগ্য নয়।

মহাত্মা গান্ধীর সত্যগ্রহ দর্শনে সত্যের শক্তি ও আত্মশক্তির উপর বিশেষ গুরুত্ব আরোপ করা হয়েছে। বলা হয়েছে যে, চূড়ান্ত বিচারে সত্য সফল হবে। ‘ধর্ম জয়তে’ কথার তাৎপর্য হল সত্য সর্বদা প্রতিষ্ঠিত হয়। কারণ সত্যই হল ধর্ম। মানুষের আত্মশক্তির দুটি দিক বর্তমান। একটি হল সীমাবদ্ধ, অন্যটি অসীম। আত্মশক্তির সীমাবদ্ধ দিকটি ভ্রান্তিপূর্ণ ও দুর্বলতায়ুক্ত, নির্মল-নিষ্কলুষ নয়। ভ্রান্তিপূর্ণ মিথ্যা আত্মশক্তির অভিব্যক্তির কথা বলা উপসংহার হয় নি, বলা হয়েছে সম্পূর্ণ সত্যভিত্তিক অসীম আত্মশক্তির বিকাশ ও অভিব্যক্তির কথা। ভ্রান্ত, সীমাবদ্ধ ও অসত্য আত্মশক্তির অভিব্যক্তি আক্রমণাত্মক। কিন্তু সত্যনিষ্ঠ ও অসীম আত্মশক্তির অভিব্যক্তি হল সত্যগ্রহ। অসত্য যখন আক্রমণাত্মক হয়ে উঠে, তখন তা প্রতিহত করা দরকার। এ রকম ক্ষেত্রে নির্লিপ্ত থাকলে জনজীবন অসত্যের দ্বারা আচ্ছন্ন হয়ে পড়বে। এই কারণে অসত্য আত্মশক্তির আক্রমণাত্মক অভিব্যক্তি প্রতিহত করার জন্য সত্যগ্রহের উপর বিশেষ গুরুত্ব আরোপ করা হয়।

৪.৫. সর্বোদয় সম্পর্কে গান্ধীজির ধারণা (Gandhiji's Concept of Sarvodaya)

সর্বোদয় দর্শন হল মহাত্মার জীবন-বেদের একটি গুরুত্বপূর্ণ বিষয়। এ বিষয়ে গান্ধীজির উপর রাফিনের *Unto this last* গ্রন্থটির প্রভাব সুস্পষ্ট। গান্ধীজি নিজে স্বীকার করে বলেছেন : “That book marked a turning point in my life.” তিনি ‘আত্মকথা’য় আরও বলেছেন যে, “যে সমস্ত গভীর বিশ্বাস আমার হৃদয়ের মধ্যে নিহিত ছিল, এই বইটিতে আমি তাহারই

কতকগুলির প্রতিবিশ্ব দেখিতে পাইয়াছিলাম।” গান্ধীজি এই বইটির গুজরাটি সংস্করণের নামকরণ করেন ‘সর্বোদয়’। ১৯০৪ সালে তাঁর ‘আত্মকথায়’ গান্ধীজি সর্বোদয়ের তিনটি সিদ্ধান্তের উল্লেখ করেছেন : (১) সমষ্টির কল্যাণের মধ্যেই ব্যক্তিকল্যাণ নিহিত, (২) জীবিকা অর্জনের অধিকার সকলের সমান, তাই উকিল ও নাপিতের কাজের মূল্য অভিন্ন, (৩) শ্রমভিত্তিক জীবনই হল সার্থক জীবন, কারণ শ্রমের গুরুত্বই সর্বাধিক। রাজনীতিক চিন্তাজগতে মহাত্মা গান্ধী কিছু অবিস্মরণীয় ও অভিনব অবদান রেখেছেন। এ রকম একটি বিষয় হল সর্বোদয় ধারণার উৎস। গান্ধীজির সর্বোদয়তত্ত্ব। মানবসভ্যতার ইতিহাসে গান্ধীজির সর্বোদয় তত্ত্বের গুরুত্ব ও তাৎপর্য অপরিসীম। মহাত্মা গান্ধী বিশ্বাস করতেন যে, মানবজাতির জন্য ভবিষ্যতের সুখী সমাজ সর্বোদয় পদ্ধতিতেই গড়ে তোলা যায়। অধ্যাপক জোহারী (J. C. Johari) তাঁর *Principles of Modern Political science* শীর্ষক গ্রন্থে বলেছেন : “Sarvodaya literally meaning ‘the uplift of all’ is the most appropriate name of Gandhian socialism. It is a principle of a new philosophical, social, ethical, economic and political order whose aim, in the words of Gandhiji’s spiritual disciple, Vinoba Bhave, is ‘that all may be happy’.”

‘সর্বোদয়’ কথাটি ‘সর্ব’ এবং ‘উদয়’—এই দুটি শব্দের সমাহারে সৃষ্ট। ‘সর্বোদয়’ কথাটির আক্ষরিক অর্থ হল সকলের কল্যাণ। সর্বোদয়ের মধ্যে সকলের কল্যাণের ধারণা বিধৃত আছে—কোন বিশেষ ব্যক্তি, গোষ্ঠী বা শ্রেণীর কল্যাণ নয়। সর্বোদয় সমাজ হল শ্রেণীহীন সমাজ। সকলেই এখানে সমান। জাতি, ধর্ম, বর্ণ, ধনী-দরিদ্র, অভিজাত-অভাজন প্রভৃতি কোন কারণে কারও সঙ্গে এখানে কোন রকম পার্থক্য করা হয় না। সর্বোদয় সকল ধর্মকেই সমান শ্রদ্ধার চোখে দেখে। সর্বব্যাপী প্রেম-প্রীতি ভালোবাসাই হল এ রকম সমাজের ভিত্তি। এখানে সবল দুর্বলকে রক্ষা করে, প্রত্যেকে প্রত্যেকের মঙ্গল করে এবং সকলেই সমাজের সদস্য হিসাবে গণ্য হয়। কোন ব্যক্তি বা গোষ্ঠীকে অবদমিত করা বা শোষণ-পীড়নের ঘটনা এখানে ঘটে না। সর্বোদয় সমাজে সকলের কল্যাণ সাধনে সকলে

নিযুক্ত থাকবে। ব্যক্তির কল্যাণ সমষ্টির কল্যাণের মধ্যেই নিহিত আছে। সমষ্টিগতভাবে সকল মানুষ ঐক্য ও সংহতি সূত্রে আবদ্ধ থাকবে। অহিংস বা সুখ-শান্তিপূর্ণ সমাজব্যবস্থা গড়ে তোলার আদর্শমূলক আলোচনা সর্বোদয় তত্ত্বের মধ্যে পাওয়া যায়। উনবিংশ শতাব্দীর হিতবাদী দর্শনে ‘সর্বাধিক মানুষের সর্বাধিক কল্যাণের’ কথা বলা হয়। কিন্তু মহাত্মা গান্ধীর সর্বোদয় তত্ত্বে একের পরিবর্তে অপরের কল্যাণ নয়, বলা হয়েছে সকলের কল্যাণের কথা। এই সকলের কল্যাণই হল ভবিষ্যতের যথার্থ সুখী সমাজের পূর্বশর্ত। মহাত্মার মতানুসারে সংখ্যাগরিষ্ঠের কল্যাণ সাধনের মাধ্যমে সমাজের প্রকৃত কল্যাণ সাধিত হতে পারে না। উপযোগিতাবাদীদের মত সংখ্যাগরিষ্ঠ মানুষের কল্যাণের উপর জোর দিলে সংখ্যালঘুর স্বার্থ বিপন্ন হবে। অনেকের মতে অদ্বৈত বেদান্ত দর্শনের সকলের কল্যাণের ভিত্তিতে গান্ধীজির ‘সর্বোদয়’ ধারণা গড়ে উঠেছে। সম্পূর্ণানন্দ (Sampurnanand) তাঁর *Indian Socialism* শীর্ষক রচনায় বলেছেন :

“It (Sarvodaya) is the name chosen by Mahatmaji for what he considered to be the goal of all effort in the field of public work. It means the Udaya (upliftment) of all, udaya standing not only for material prosperity but for spiritual good.”

সর্বোদয় আত্মত্যাগে বিশ্বাসী। পরার্থে আত্মত্যাগ সর্বোদয়ের মূল আদর্শ। আত্মসুখের পরিবর্তে অপরের সুখ-স্বাচ্ছন্দ্য বিধানই হবে এখানে প্রত্যেকের আদর্শ, প্রত্যেকের আত্মত্যাগ লক্ষ্য হবে অপরের স্বার্থে কিছু দান করা, গ্রহণ করা নয়। এ রকম সমাজে কোনরূপ দ্বন্দ্ব বা বিদ্বেষ থাকবে না। সর্বোদয় সমাজে আত্মত্যাগের আদর্শ এবং

নেওয়ার পরিবর্তে দেওয়ার মনোভাব মানুষের মধ্যে থাকতে হবে। নিজের সুখ-স্বার্থ নয়, অন্য সকলের কল্যাণের জন্য আত্মোৎসর্গের মনোভাব থাকতে হবে। অধ্যাপক বিশ্বনাথ প্রসাদ ভার্মা (V. P. Varma) এ প্রসঙ্গে মন্তব্য করেছেন : ...the significance of Sarvodaya lies in stressing the permanent value of self-abrogation.”

সর্বোদয় সমাজে উৎপাদনের জন্য প্রত্যেকেই পরিশ্রম করবে। প্রত্যেকে তার সামর্থ্য অনুসারে সমাজের জন্য কাজ করবে এবং প্রয়োজন অনুসারে পাওনা পাবে। প্রত্যেকে উন্নতির সমান সুযোগ পাবে। এখানে কোন রকম আর্থিক বৈষম্য স্বীকার করা হবে না। সর্বোদয় কৃষি-শিল্পভিত্তিক অর্থনীতি গড়ে তোলার পক্ষপাতী। কৃষি ও শিল্প হবে পরস্পরের পরিপূরক।

গণতান্ত্রিক সমাজবাদ ও মার্কসীয় সমাজবাদে রাষ্ট্র কর্তৃক সম্পত্তির অর্থনৈতিক আদর্শ জাতীয়করণের কথা বলা হয়। গণতান্ত্রিক সমাজবাদে উপযুক্ত ক্ষতিপূরণ দিয়ে সম্পত্তির জাতীয়করণের কথা বলা হয় ; কিন্তু মার্কসীয় সমাজবাদে ক্ষতিপূরণ ছাড়াই বলপূর্বক সম্পত্তি জাতীয়করণের কথা বলা হয়। কিন্তু সর্বোদয় তত্ত্বে সম্পত্তির জাতীয়করণের ধারণাকে স্বীকার বা সমর্থন করা হয় নি। পরিবর্তে গান্ধীজি সম্পত্তির অধিব্যবস্থার উপর গুরুত্ব আরোপ করেছেন। অধ্যাপক জোহারী (J. C. Jorhari) তাঁর *Principles of Modern Political Science* শীর্ষক গ্রন্থে মন্তব্য করেছেন : “Sarvodaya pleads for villagisation, decentralisation and gifts as those of labour (*Shramdan*), of land (*Bhoodan*), of wealth (*sampathidan*), and of big shares in village property (*Gramdan*).”

সর্বোদয় সমাজে এইভাবে সামাজিক ও অর্থনৈতিক বন্ধন থেকে মুক্তি ঘটে এবং নৈতিক ও আধ্যাত্মিক উন্নতির পথ প্রশস্ত হয়। সর্বোদয়ের লক্ষ্য হল এক উন্নত নৈতিক পরিবেশ দেশের মধ্যে গড়ে তোলা। গান্ধীজির মতানুসারে সত্য, অহিংসা ও সং উপায়ের মাধ্যমে এইরকম নৈতিক পরিবেশ গড়ে তোলা সম্ভব হবে। গান্ধীজি মৌলিক নীতি ও আদর্শ হিসাবে সত্যের উপর গুরুত্ব আরোপ করেছেন। তিনি বলেছেন : “For me Truth is the sovereign principle, which includes numerous other principles.”

নৈতিক পরিবেশ তেমনি অহিংসার নীতিও মহাত্মার কাছে প্রাণশক্তিস্বরূপ। তিনি বলেছেন : “For me, non-violence is not a mere philosophical principle. It is the rule and breath of my life.” এই সমাজ প্রীতি-ভালোবাসা, সহানুভূতি-সহযোগিতার ভিত্তিতে গড়ে উঠবে। ব্যক্তি-জীবনের লক্ষ্য হবে অনাড়ম্বর জীবনযাপন ও মহান চিন্তা। এ বিষয়ে অধ্যাপক ড. বিশ্বনাথ প্রসাদ ভার্মার অভিমত হল : “Sarvodaya is giving an expression to moral principle of cardinal importance, because it wants to enshrine the primacy of goodness and character in place of the skill of manipulation and self-assertion.”

সর্বোদয় গ্রাম ও গ্রামীণ সভ্যতার উপর গুরুত্ব আরোপ করে। এই তত্ত্বে সনাতন গ্রামীণ সভ্যতা-সংস্কৃতি পরিপোষণের কথা বলা হয়। গান্ধীজি অনগ্রসর ও অবহেলিত গ্রামগুলির উন্নয়ন সর্বোদয়ের অন্যতম লক্ষ্য হিসাবে ব্যক্ত করেছেন। তাঁর মতানুসারে সর্বোদয় গণতন্ত্রে অগণিত গ্রামকে কেন্দ্র করে ক্রমশ বৃহত্তর গভীর সৃষ্টি হবে। গ্রামই হল ভারতীয় সমাজজীবনের প্রাণকেন্দ্র। এই কারণে সর্বোদয়ের আদর্শ হিসাবে গান্ধীজি গ্রামীণ জীবনের গ্রামীণ জীবন সর্বাঙ্গীণ উন্নতির কথা বলেছেন। গান্ধীজির ‘সর্বোদয়’-এর ধারণাকে

সংক্ষেপে ব্যাখ্যা করতে গিয়ে আচার্য বিনোবা ভাবে বলেছেন যে প্রথমে গ্রাম-রাজ (Government by village) প্রতিষ্ঠিত হবে। তারপর রামরাজ্য প্রতিষ্ঠিত হবে। গ্রাম-রাজের স্তরে রাষ্ট্র থাকে, কিন্তু তার প্রকৃতি বদলায়। তারপর শাসনহীন কর্তৃত্বহীন রামরাজ্য গড়ে ওঠে। একেই বলা হয় সর্বোদয় সমাজ, অর্থাৎ স্বর্গরাজ্য বা বৈকুণ্ঠ। অধ্যাপক জোহারী এ বিষয়ে বলেছেন :

“It (Sarvodaya) desires the establishment of small village communities in the form of self-sufficing autonomous republics under the administration of panchayats.” সর্বোদয় সমাজ হবে গ্রামভিত্তিক। সর্বোদয় তত্ত্বে শহর-জীবনের পরিবর্তে গ্রাম-জীবনের উপর বিশেষ গুরুত্ব আরোপ করা হয়। গ্রাম-ভিত্তিক সর্বোদয় সমাজ হবে সম্ভাব্য, সম্প্রীতি ও সহানুভূতির রাজত্ব। এ রকম সর্বোদয় সমাজে সকলে সহজ-সরল জীবন যাপন করবে, কিন্তু উচ্চস্তরের চিন্তা করবে। ভি. এন. ট্যানডন (V. N. Tandon) তাঁর *The Social and Political Philosophy of Sarvodaya after Gandhi* শীর্ষক গ্রন্থে মন্তব্য করেছেন : “(Sarvodaya) seeks to build up a society with a bias towards rural civilisation, in which Industries would be decentralised and villages would be as self-sufficient as possible. The desire for a high but simple life would replace the present craze for multiplicity of goods, cooperation would take the place of competition and community spirit would animate society.”

সর্বোদয় আধুনিক সভ্যতা ও শিল্পায়নকে সমর্থন করে না। এই তত্ত্ব অনুসারে বলা হয় যে, আধুনিক যন্ত্রচালিত সভ্যতা ও শিল্পনীতি ব্যক্তিসত্তা ও সুকুমার বৃত্তিসমূহকে ধ্বংস করে। আধুনিক শিল্প-সভ্যতার ভূমি-সংস্কার ও ভূমিহীনদের মধ্যে ভূমিবণ্টন সর্বোদয়ের অন্যতম নীতি বিরোধী হিসাবে গণ্য হয়। অধ্যাপক ড. বিশ্বনাথ প্রসাদ ভার্মা বলেছেন : “If the *bhoodan* and *gramdan* are technics of Agrarian revolution based on moral force, *sampathidan* is a significant path in the transformation of capitalism into the sarvodaya society.”

সর্বোদয় দর্শন অনেকাংশে নৈরাজ্যবাদী। এই তত্ত্ব অনুসারে রাষ্ট্র বলপ্রয়োগ ও শোষণের মাধ্যম হিসাবে কাজ করে। সর্বোদয়ের লক্ষ্য হল রাষ্ট্রক্ষমতাকে ন্যূনতম ও সংকীর্ণ গণ্ডীর মধ্যে আবদ্ধ রাখা। গ্রামভিত্তিক ভারতের পরিপ্রেক্ষিতে এই রাষ্ট্রব্যবস্থাকে ‘গ্রামস্বরাজ’ বলা হয়ে থাকে। শ্রী জয়প্রকাশ নারায়ণ এবং আচার্য বিনোবা ভাবে প্রমুখ সর্বোদয় নেতা জনকল্যাণমূলক রাষ্ট্রতত্ত্বের সমালোচনা করেছেন।

সর্বোদয় ধারণায় রাজনৈতিক দলহীন ও ধর্মনিরপেক্ষ গণতন্ত্রের কথা বলা হয়। সর্বোদয় তত্ত্ব অনুসারে দলীয় ব্যবস্থা জনগণকে বিভিন্ন গোষ্ঠীতে বিভক্ত করে এবং এক গোষ্ঠী অন্য গোষ্ঠীর বিরুদ্ধে চক্রান্ত করে। রাজনৈতিক দল জনগণকে ক্ষমতালোভী করে তোলে। ক্ষমতার মাত্রাতিরিক্ত লোভ হিংসার তাণ্ডবের জন্ম দেয়। দলীয় গণতান্ত্রিক ব্যবস্থায় স্বার্থান্ধ রাজনীতিবিদদের দাপট পরিলক্ষিত হয়। এই শ্রেণীর সংকীর্ণমনা রাজনীতিবিদরা সমাজের সংখ্যাগরিষ্ঠ মানুষের ইচ্ছা-অনিচ্ছাকে অগ্রাহ্য করে এবং সামাজিক ও আর্থনৈতিক ক্ষেত্রে অনৈক্য ও বৈষম্যের সৃষ্টি করে। দলীয় রাজনীতিক ব্যবস্থায় লাগামছাড়া দুর্নীতি প্রশ্রয় পায়। এই কারণে সর্বোদয় তত্ত্বে রাজনীতিক দলব্যবস্থার বিরোধিতা করা হয়েছে। অধ্যাপক ড. বিশ্বনাথ প্রসাদ ভার্মা এ বিষয়ে মন্তব্য করেছেন : “It (Sarvodaya) wants to replace party strifes, jealousies and competition by sacred law of cooperative mutuality and dominant altruism.”

সর্বোদয় সমাজে সংখ্যাগরিষ্ঠের শাসন নয়, সকলের শাসন প্রতিষ্ঠিত হয়। সর্বোদয় প্রত্যক্ষ বা অংশগ্রহণকারী গণতন্ত্র এবং বিকেন্দ্রীভূত রাষ্ট্র প্রতিষ্ঠায় বিশ্বাসী। সর্বোদয় সমাজই হল সর্বোদয় সমাজ। এখানে কতিপয় মানুষের পরিবর্তে সকলের শাসন কায়েম হয়। স্বভাবতই সর্বোদয় সমাজে রাষ্ট্র গুরুত্বহীন ও অপ্রয়োজনীয় প্রতিপন্ন হয়। গ্রাম পঞ্চায়েতের মাধ্যমে এই ধরনের শাসন প্রতিষ্ঠিত হতে পারে। সর্বোদয় সমাজের

গ্রাম পঞ্চায়েতগুলি নির্বাচিত হবে সর্বসাধারণের দ্বারা। এক্ষেত্রে কোন দলগত ভিত্তি থাকবে না। সর্বোদয় দর্শন পাশ্চাত্য গণতান্ত্রিক দলীয় শাসনব্যবস্থার বিরোধী।

গান্ধীজি সর্বোদয় সমাজের স্বার্থে 'লোক-শক্তি' জাগ্রত করার কথা বলেছেন। লোক-শক্তিই হল সমাজ প্রগতির মূল ভিত্তি। গান্ধীজির মতানুসারে প্রেম-প্রীতি-আত্মত্যাগ এবং সহযোগিতা, সহিষ্ণুতা ও অহিংসার মাধ্যমে লোক-শক্তিকে জাগ্রত করা সম্ভব।

সর্বোদয় আন্দোলনের মাধ্যমে এক নতুন ধরনের রাজনীতি প্রচলিত করার কথা বলা হয়েছে। এই নতুন ধরনের রাজনীতিকে বলা হয়েছে 'লোকনীতি'। এই লোকনীতির মূল কথা হল আত্মত্যাগ, আত্মনিয়ন্ত্রণ, সুশৃঙ্খল আচরণ, নৈতিক স্বাধীনতা, ঈশ্বর বিশ্বাস, স্বার্থশূন্য জনসেবা, নিঃস্বার্থভাবে দায়িত্ব পালন প্রভৃতি। এই লোকনীতির সঙ্গে পশ্চিমী রাজনীতির মৌলিক পার্থক্য বর্তমান। পশ্চিমী প্রকৃতির রাজনীতিতে ক্ষমতা, কর্তৃত্ব, ক্ষমতা দখলের প্রতিদ্বন্দ্বিতা, বলপ্রয়োগ, প্রশাসন, নিয়ন্ত্রণ, স্বার্থসর্বস্ব রাজনীতিক দল ও গোষ্ঠীর প্রাধান্য প্রভৃতি পরিলক্ষিত হয়।

সর্বোদয় সমাজ সত্য ও অহিংসার উপর প্রতিষ্ঠিত হবে। এই সমাজে মানুষের চরিত্র হবে উন্নত। তার ফলে অনৈতিক কার্যকলাপ থাকবে না। এই সমাজে উচ্চ-নীচ, অভিজাত-অভাজন, ধনী-দরিদ্র প্রভৃতি পার্থক্য থাকবে না। সামাজিক পার্থক্য থাকবে না বলে অধিকতর স্বাধীনতা শ্রেণীগত বিদ্বেষও থাকবে না। একে অপরকে শোষণ করবে না। সংখ্যাগুরু দ্বারা সংখ্যালঘুর শোষণের ঘটনা ঘটবে না। সকলের সততা ও ন্যায়-নীতিবোধ হবে উন্নত। স্বাধীন বিচারবোধের দ্বারা সকলে পরিচালিত হবে। স্বভাবতই সর্বোদয়-সমাজে সকলে অধিকতর স্বাধীনতার অধিকারী হবে।

সমালোচনা (Criticism) : আধুনিক রাষ্ট্রবিজ্ঞানের আলোচনায় বিভিন্ন দৃষ্টিকোণ থেকে গান্ধীজির সর্বোদয় দর্শনের বিরূপ সমালোচনা করা হয়।

(১) সমালোচকদের মতানুসারে সর্বোদয় তত্ত্ব হল একটি অবাস্তব কাল্পনিক আদর্শ। প্রকৃতিগতভাবে স্বার্থপর এবং অন্যান্য বহুবিধ ক্রটিযুক্ত মানুষকে নিয়ে সর্বোদয় সমাজের প্রতিষ্ঠা বাস্তবে অলীক প্রতিপন্ন হয়। মহাত্মা মানব প্রকৃতির বাস্তব রূপটিকে বিবেচনা করেন নি। সর্বোদয় একটি মহান আদর্শ। কিন্তু বাস্তব জগতে এই নীতি ও আদর্শ অনুসারে কোন সমাজব্যবস্থার সংগঠন কার্যতঃ অসম্ভব। সর্বোদয় সমাজের সৃষ্টি ও সাফল্য মানুষের প্রকৃতি-প্রবৃত্তি ও কার্যকলাপের উপর নির্ভরশীল। সর্বোদয় সমাজের সাফল্যের জন্য মানুষের মধ্যে আত্মত্যাগের মানসিকতা থাকা দরকার। কিন্তু বাস্তবে সর্বোদয়ের এই পূর্বশর্তটি অতিমাত্রায় অনিশ্চিত। এ বিষয়ে গান্ধীজির মনেও সংশয় সন্দেহ ছিল।

(২) সর্বোদয় দর্শনের দলহীন গণতন্ত্রের (Partyless democracy) ধারণাও অলীক কল্পনামাত্র। বর্তমানে গণতান্ত্রিক শাসনব্যবস্থায় রাজনৈতিক দলের অস্তিত্বকে অপরিহার্য মনে করা হয়। তাছাড়া শ্রেণীবিভক্ত সমাজে বিভিন্ন পরস্পর-বিরোধী দলহীন গণতন্ত্র অসম্ভব শ্রেণীস্বার্থের ধারক ও বাহক হিসাবে একাধিক রাজনৈতিক দলের অস্তিত্বকে অস্বীকার করা যায় না। দলহীন পরিচালন ব্যবস্থা গ্রামীণ সমাজের সীমিত পরিধির মধ্যে সম্ভব হলেও হতে পারে, কিন্তু জাতীয় জীবনের বৃহত্তর ক্ষেত্রে তা অসম্ভব। এই কারণে বর্তমান গণতান্ত্রিক শাসনব্যবস্থা বলতে দলীয় শাসনব্যবস্থাকেই বোঝানো হয়ে থাকে।

(৩) সর্বোদয় সমাজ সংখ্যাগরিষ্ঠের নয়, সকলেরই শাসন প্রতিষ্ঠায় বিশ্বাসী। কিন্তু সমালোচকদের মতানুসারে এই পরিকল্পনা অবাস্তব ও ভিত্তিহীন। বাস্তবে সংখ্যাগরিষ্ঠের শাসনের কোন বিষয়ে সকলে সমমত পোষণ করতে পারে না। আর রাষ্ট্রনৈতিক সমালোচনা অযৌক্তিক ক্ষেত্রে একমত প্রতিষ্ঠার পরিকল্পনা অবাস্তব ব্যাপার। তা ছাড়া বর্তমান

গণতান্ত্রিক শাসনব্যবস্থা বলতে সংখ্যাগরিষ্ঠের শাসনকেই বোঝানো হয়। সর্বোপরি সংখ্যাগরিষ্ঠের শাসনে সরকারী সিদ্ধান্ত সব সময় সংখ্যালঘুর স্বার্থবিরোধী হবে—এ রকম যুক্তি অর্থহীন।

(৪) গান্ধীজি ক্ষমতা বিকেন্দ্রীকরণের কথা বলেছেন। কিন্তু সমালোচকদের মতানুসারে ক্ষমতা বিকেন্দ্রীকরণের মাধ্যমে সমাজে সকল প্রকার সমস্যার সমাধান করা সম্ভব নয়, তাছাড়া ক্ষমতা বিকেন্দ্রীকরণ সংকীর্ণ আঞ্চলিকতা ও প্রাদেশিকতা এবং সামাজিক বিশৃঙ্খলার সৃষ্টি করতে পারে। আবার ভৌগোলিক ক্ষমতা-বিকেন্দ্রীকরণের মাধ্যমে স্বয়ংসম্পূর্ণ গ্রামীণ অর্থনীতির ভিত্তিতে সকল সমস্যার সমাধান অসম্ভব।

(৫) সমালোচকদের মতে সর্বোদয় সভ্যতা পশ্চাৎগতির লক্ষণ। এখানে সনাতন জীবনধারা এবং প্রাচীন ভারতের গ্রামীণ আদর্শকে বাস্তবে রূপায়িত করার কথা বলা হয়। আধুনিক নগর সভ্যতা, শিল্পভিত্তিক অর্থনীতি প্রভৃতি বিংশ শতাব্দীর শিল্প-সভ্যতার কোন কিছুকেই সর্বোদয় তত্ত্বে স্বীকার করা হয় নি।

(৬) সর্বোদয়ের অন্যতম প্রবক্তা আচার্য বিনোবা ভাবে ভূমিসংস্কার ও ভূমিহীন কৃষকদের মধ্যে ভূমি বণ্টনের জন্য যে ভূ-দান আন্দোলনের কথা বলেছেন তাও এক অবাস্তব কর্মসূচী। এইভাবে ভূমিসমস্যার সুষ্ঠু ও সঠিক সমাধান যে অসম্ভব তা ইতিমধ্যে প্রমাণিত হয়েছে।

(৭) গান্ধীজির সর্বোদয় তত্ত্বে শ্রেণী-দ্বন্দের পরিবর্তে শ্রেণীসমঝোতার কথা বলা হয়। কিন্তু মার্কসবাদীদের মতানুসারে অর্থনৈতিক বৈষম্যমূলক সমাজে শ্রেণীসংঘাতের ঘটনা অবশ্যগত। এ হল এক ঐতিহাসিক সত্য। গান্ধীজি এই ঐতিহাসিক সত্যকে উপেক্ষা করেছেন। এই কারণে মতবাদটি ঐতিহাসিক।

(৮) মার্কসবাদিগণ গান্ধীজির সত্য ও অহিংসার নীতিকে সমর্থন করেন না। তাঁদের মতানুসারে সমাজে বিভিন্ন শ্রেণী ও পরস্পর-বিরোধী শ্রেণী-স্বার্থ থাকলে সত্য ও অহিংসা থাকতে পারে না। তাই মার্কসবাদীরা প্রয়োজনে সহিংস বিপ্লবের কথা বলেন।

(৯) মহাত্মা গান্ধী শাসনমুক্ত সমাজ পরিচালনার ক্ষেত্রে সকলের অংশগ্রহণের কথা বলেছেন অর্থাৎ তিনি প্রত্যক্ষ গণতন্ত্র প্রতিষ্ঠার পক্ষপাতী। কিন্তু জনসাধারণের সকলে শাসনকার্যে যোগ দেবে এ ধারণা অচল। এখনকার বৃহদায়তনবিশিষ্ট ও জনবহুল সমাজব্যবস্থায় প্রত্যক্ষ গণতান্ত্রিক ব্যবস্থা অসম্ভব এবং অনেকের মতে অকাম্য।

(১০) অধ্যাপক জোহারীর অভিমত অনুযায়ী মহাত্মা গান্ধীর সর্বোদয় তত্ত্ব বিভিন্ন রাষ্ট্রনৈতিক দৃষ্টিভঙ্গি থেকে বিরূপ সমালোচনার সম্মুখীন হয়েছে। মার্কসবাদীদের মতানুসারে সর্বোদয় তত্ত্ব ওয়েন ও সাইমনের মতবাদের সমগোত্রীয়। সর্বোদয় তত্ত্বের সীমাবদ্ধ সরকার ও মানুষের ন্যূনতম প্রয়োজনের ধারণাকে সামগ্রিকতাবাদী রাষ্ট্রবিজ্ঞানীরা সমর্থন করেন না। তেমনি আবার উদারনৈতিক রাষ্ট্রবিজ্ঞানীরা সর্বোদয় তত্ত্বকে সন্দেহের চোখে দেখেন। সর্বোদয়ের আদর্শ সমাজ মাটির পৃথিবীতে প্রতিষ্ঠিত হওয়া সম্ভব কিনা সে-বিষয়ে এই শ্রেণীর চিন্তাবিদদের মনে সংশয়-সন্দেহ ছিল। অধ্যাপক

জোহারী বলেছেন : “The Marxists would scoff at the whole school of Sarvodaya as one belonging to the world of Owenites and St. Simonians ; the collectivists would not endorse the suggestion of a very limited government in view of a man’s life of minimum wants ; and liberals would have every reason to doubt the feasibility of an ideal society as conceived by the Sarvodayists.”

(১১) মহাত্মা গান্ধীর সর্বোদয় তত্ত্বে মানুষের বিভিন্ন চাহিদা ও দাবি-দাওয়াকে সীমাবদ্ধ করার আলোচনা আছে। সর্বোদয়ের আদর্শে রাজনীতিক প্রতিষ্ঠান গুরুত্বহীন প্রতিপন্ন হয়। বস্তুত সর্বোদয় তত্ত্বকে সর্বাংশে রাজনীতিক মতবাদ বলা যায় না বরং এ হল বহুলাংশে একটি সামাজিক ধর্মীয় আদর্শ।

বহু বিরূপ সমালোচনা সত্ত্বেও গান্ধীজির সর্বোদয়-দর্শনের আদর্শগত মূল্য অনস্বীকার্য। সর্বোদয় তত্ত্বে এক আদর্শ ও উন্নত সমাজের পরিকল্পনা প্রকাশ করা হয়েছে। সত্য ও অহিংসার সঙ্গে বিশ্ববাসীর প্রতি গান্ধীজির আর একটি মূল্যবান নীতিশিক্ষা হল লক্ষ্য ও পথের অভিন্নতা। তাঁর মতানুসারে উত্তম কোন লক্ষ্যে উপনীত হওয়ার জন্য উপায়টিও উৎকৃষ্ট হওয়া আবশ্যিক। বর্তমানে গান্ধীজির পঞ্চায়েতীরাজ সম্পর্কিত ধারণা বিশেষভাবে গ্রহণযোগ্য বিবেচিত হয়।

ভারতের বিভিন্ন রাজ্যে বর্তমানে পঞ্চায়েত ব্যবস্থা চালু আছে। তা ছাড়া মূল্যায়ন বেকার সমস্যার পরিপ্রেক্ষিতে গান্ধীজির শ্রমনিবিড় উৎপাদন পদ্ধতির গুরুত্ব ও তাৎপর্য অস্বীকার করা যায় না। গান্ধীজির সর্বোদয়ের আদর্শের পরিপূর্ণ ও যথাযথ বাস্তবায়ন সম্ভব হলে সমস্যাংকুল বিশ্বের বহু জটিল সমস্যার সূষ্ঠু ও স্থায়ী সমাধান সম্ভব হবে। সর্বোদয় তত্ত্বের মূল্যায়ন প্রসঙ্গে অধ্যাপক জোহারী (J. C. Johari) তাঁর *Principles of Modern Political Science* শীর্ষক গ্রন্থে মন্তব্য করেছেন : “It takes much from the spirit of Western Liberalism and Socialism and integrates it with the best of the spiritualism and humanism of the East. It assimilates all that is good and valuable in others so long as it is consonant with the ethos and spirit of the Indian culture and philosophy.”

৪.৬. অছি ব্যবস্থা সম্পর্কিত গান্ধীজির ধারণা (Gandhiji's Concept of Trusteeship)

মহাত্মা গান্ধীর রাষ্ট্রচিন্তার একটি অত্যন্ত গুরুত্বপূর্ণ দিক হল তার অছিবাদের ধারণা। গান্ধীজির রাষ্ট্রচিন্তায় অছিবাদ বলতে স্বরাজ বা গ্রাম স্বরাজ অর্জনের এক বিশেষ উপায়কে বোঝায়। হিন্দু স্বরাজ বা সর্বোদয় অর্জন করার মূল কথা হল ত্যাগের আদর্শ। মহাত্মা গান্ধীর অছিবাদের ধারণায় এই ত্যাগের আদর্শই প্রতিফলিত হয়েছে। গান্ধীজির রাজনীতিক দর্শন ও কর্মসূচীর মূল উদ্দেশ্য ছিল দেশের আর্থ-সামাজিক ও রাজনীতিক অবস্থার মৌলিক সংস্কার সাধনের জন্য মানুষের মানসিকতার পরিবর্তন সাধন। এবং এই কারণেই গান্ধীজি অছি-ব্যবস্থার ব্যাপারে আন্তরিকভাবে আগ্রহী হয়েছেন। তাঁর অছিবাদী ধারণার অছিবাদী ধারণার উৎস প্রেরণা হল ভারতের সনাতন ধর্ম। এ দেশের সনাতন ধর্ম-দর্শনে স্বার্থপরতা ও আত্মকেন্দ্রিকতা অনুপস্থিত। মহাত্মা গান্ধীর অছিবাদী ধ্যান-ধারণার উৎস হিসাবে ঈশোপনিষদের কথা বলা হয়। এই উপনিষদের প্রথম শ্লোকেই অছিবাদী চিন্তা-ভাবনার কথা আছে। ঈশোপনিষদের এই শ্লোকে ত্যাগের মাধ্যমে ভোগের কথা বলা হয়েছে। বলা হয়েছে যে, প্রত্যেকে তার অর্জিত যাবতীয় জাগতিক সম্পদ-সামগ্রী পরমেশ্বরে নিবেদন করে সকলের সঙ্গে সমভাবে সমাজের সকলের কল্যাণে ভোগ করবে। তা ছাড়া অপরের প্রাপ্য সম্পদ আত্মসাৎ করতে নিষেধ করা হয়েছে। ত্যাগের মাধ্যমে ভোগের আদর্শ এবং অপরের ধন-সম্পদ আত্মসাৎ না করার নীতি গান্ধীজির মধ্যে যুবা বয়সেই দৃঢ়মূল হয়ে যায়।

মহাত্মা গান্ধী বিশ্বাস করতেন যে, ত্যাগের মাধ্যমে ভোগ বাস্তবে রূপায়িত হওয়া সম্ভব।

এই উদ্দেশ্যে উপনীত হওয়ার জন্য তিনি সামাজিক ধন-সম্পদকে ব্যক্তিগত বা রাষ্ট্রীয় মালিকানায় রাখায় বিরোধিতা করেছেন। সামাজিক ধন-সম্পদকে তিনি অছির অধীনে রাখার সুপারিশ করেছেন। সমাজে আয় ও সম্পদের

সম্পদের সামাজিক
মালিকানা

বণ্টনের বৈষম্য দূর করা দরকার। এবং তার জন্য জরুরী হল ধন-সম্পদ ও প্রাকৃতিক সম্পদসমূহের উপর সামাজিক নিয়ন্ত্রণ সুনিশ্চিত করা। অছি ব্যবস্থার মাধ্যমে এই সামাজিক নিয়ন্ত্রণ সম্ভব ও সফল হতে পারে। ধন-সম্পত্তির উপর ব্যক্তিগত বা রাষ্ট্রীয় মালিকানা কে অছি-ব্যবস্থার মাধ্যমে সামাজিক মালিকানায় পরিণত করা যায়।

মহাত্মা গান্ধীর মতানুসারে সামাজিক সম্পদসমূহ সকলের ভোগের জন্য। সুতরাং সকলের ভোগের জন্য সমাজের যাবতীয় ধন-সম্পত্তি উন্মুক্ত করে দেওয়া দরকার। সমাজের সকল সম্পদ-সম্পত্তির মালিকানা মুষ্টিমেয় মানুষের হাতে অতিমাত্রায় কেন্দ্রীভূত হলে সমাজব্যবস্থার মধ্যে পারস্পরিক ভেদাভেদ, সন্দেহ-শত্রুতা ও শোষণমূলক সম্পর্কের সৃষ্টি হবে। এই ভয়াবহ বিচ্ছিন্নতাবোধ সমাজস্থ ব্যক্তিবর্গকে গ্রাস করবে। অছি ব্যবস্থার মাধ্যমে পুঁজিপতিরা ও ব্যবসায়ীরা অনৈতিক পথে অর্থোপার্জন থেকে বিরত হবে। তারা সৎপথে সহজ-সরল জীবন যাপন

অছি-ব্যবস্থার সাহায্যে
মানব প্রকৃতির
সংস্কার সাধন

করবে। যতটুকু অর্থ জীবনযাত্রা নির্বাহের জন্য আবশ্যিক ততটুকুই তারা অর্জন ও ভোগ করবে। এইভাবে সম্পদ-সম্পত্তির অতিমাত্রায় কেন্দ্রীভবনের আগ্রহের অবসান ঘটবে। তার ফলে সমাজব্যবস্থার মধ্যে ভেদাভেদ, শোষণ ও বৈষম্য বিলুপ্ত হবে। সম্পদ-সম্পত্তি সংগ্রহের ও

পুঞ্জীভবনের উদগ্র উন্মাদনা যদি থাকে তা হলে সমাজের সকলকে ভালবাসা যায় না। সম্পদ সংগ্রহের মাত্রাতিরিক্ত বাসনাকে বিসর্জন দিতে হবে, তবেই সমাজের সকলকে ভালবাসা সম্ভব হবে। এই কারণে গান্ধীজি অছিব্যবস্থা প্রবর্তনে পক্ষপাতী ছিলেন। অছি-ব্যবস্থার মাধ্যমে সমাজের মুষ্টিমেয় কয়েকজনের হাতে ধন-সম্পত্তির পুঞ্জীভবনের প্রবণতাকে প্রতিহত করা সম্ভব হবে। মানুষের মনকে অছি-ব্যবস্থার মাধ্যমে শোষণমূলক প্রবৃত্তির পথ থেকে নিবৃত্ত করা যাবে। মানব প্রকৃতির মৌলিক সংস্কার সাধন সম্ভব। এ বিষয়ে মহাত্মা গান্ধীর দৃঢ় প্রত্যয় ছিল।

মহাত্মা গান্ধীর রাষ্ট্রদর্শন সমাজতান্ত্রিক বা ধনতান্ত্রিক ধ্যান-ধারণার অনুগামী নয়। ধনতান্ত্রিক ও সমাজতান্ত্রিক উভয় মতবাদেরই বিরোধী হল গান্ধীজির রাষ্ট্রচিন্তা। আবার মহাত্মার রাষ্ট্রীয় মতাদর্শকে এই দুই বিপরীত মেরুর মতাদর্শের সমাহারও বলা যায় না। ধনতন্ত্রবাদ ও

ধনতন্ত্র ও সমাজতন্ত্রের
বিরোধী

সমাজতন্ত্রবাদ এই দুই মতবাদের উদ্ভব ও বিকাশ ঘটেছে পাশ্চাত্যের রাষ্ট্রনীতিক চিন্তাজগতে। এবং এই দুই মতবাদের সীমাবদ্ধতা সম্পর্কেও সকলে সচেতন। গান্ধীজি ধনতান্ত্রিক ব্যবস্থার ত্রুটি-বিচ্যুতিগুলিকে

অপসারিত করার ব্যাপারে বিশেষভাবে যত্নবান হয়েছিলেন। মানবসমাজকে অনিয়ন্ত্রিত ধনতন্ত্রের অনৈতিক কুফল থেকে মুক্ত করার ব্যাপারে গান্ধীজির উদ্যোগ-আয়োজন ও আন্তরিকতার অভাব ছিল না। এবং এই দৃষ্টিভঙ্গি থেকেই তিনি অছিবাদী মতাদর্শের কথা বলেছেন। অছিব্যবস্থা হল ধনতন্ত্র ও সমাজতন্ত্রের বাইরে এক তৃতীয় রাষ্ট্রনীতিক ব্যবস্থা।

অছি-ব্যবস্থা অনুসারে বলা হয় যে, সম্পদ-সম্পত্তি ব্যক্তিগত নিয়ন্ত্রণাধীন থাকবে। তবে সম্পত্তির মালিক-ব্যক্তি নিজেকে সম্পত্তির রক্ষক হিসাবে বিবেচনা করবে, মালিক হিসাবে মনে করবে না। এ হল ঈশোপনিষদের অপরিগ্রহের আদর্শ। অপরিগ্রহের আদর্শের উপর

অছি-ব্যবস্থার ধারণা

অছিবাদ প্রতিষ্ঠিত। মহাত্মা গান্ধীর মতানুসারে ভারতের সনাতন ঐতিহ্যের অন্যতম অঙ্গ হল অপরিগ্রহ। গান্ধীজি অপরিগ্রহ ও সমভাব এই দুটি

আদর্শের উপর জোর দিয়েছেন। তাঁর মতানুসারে অপরিগ্রহ ও সমভাবের মধ্যে বিশ্বাসযোগ্যতা নিহিত আছে। গান্ধীজির এই ধারণার উৎস হল গীতা। মহাত্মা গান্ধী তাঁর *The Story of my Experiments with Truth* শীর্ষক রচনায় বলেছেন : “I understand the Gita-teaching of non-possession to mean that those who desired salvations should act like a trustee who, though having control over great possessions, regards not an iota of them as his own.” এই ধারণা অনুসারে আমাদের ক্ষুণ্ণবৃত্তির জন্য যতটুকু প্রয়োজন,

কেবলমাত্র ততটুকুর উপরই আমাদের অধিকার আছে। তার অতিরিক্ত আশা করা ও সংগ্রহ করা চৌর্যবৃত্তির সামিল এবং শাস্তিযোগ্য অপরাধ।

অছি-ব্যবস্থার কতকগুলি মৌলিক বৈশিষ্ট্য বর্তমান। এই বৈশিষ্ট্যগুলি সম্পর্কে সংক্ষেপে অবহিত হওয়া আবশ্যিক। (ক) অছি ব্যবস্থায় সমাজের কল্যাণে ব্যবহৃত ব্যক্তিগত সম্পত্তিকে স্বীকার করা হয়েছে। ব্যক্তিগত প্রয়োজনে ব্যক্তিগত সম্পত্তির ব্যবহার অছি-ব্যবস্থায় অস্বীকৃত। ব্যক্তিগত সম্পত্তির উদ্দেশ্য হবে ত্যাগের মাধ্যমে ভোগ। (খ) অছি-ব্যবস্থার উদ্দেশ্য হল সম্পত্তি-সম্পদকে সমাজের যৌথ মালিকানায় নিয়ে আসা এবং পুঁজিবাদী অছি-ব্যবস্থার বৈশিষ্ট্য ব্যবস্থায় পরিবর্তন সাধন করা। বৈষম্যমূলক পুঁজিবাদী ব্যবস্থার অবসান এবং সাম্যভিত্তিক সমাজব্যবস্থা সৃষ্টি করাই হল লক্ষ্য। অর্থাৎ পুঁজিবাদী সমাজব্যবস্থাকে সাম্যভিত্তিক সমাজব্যবস্থায় পরিণত করাই হল অছিবাদের মূল লক্ষ্য। (গ) অছি ব্যবস্থায় মুনাকার পরিবর্তে সমাজের প্রয়োজনের পরিপ্রেক্ষিতে দ্রব্য সামগ্রীর উৎপাদন নির্ধারিত ও নিয়ন্ত্রিত হবে। (ঘ) সকলের ন্যায়সঙ্গত সর্বোচ্চ ও সর্বনিম্ন আয় অছি-ব্যবস্থায় নির্ধারিত হবে। (ঙ) অছি-ব্যবস্থায় আইন থাকতে পারে, কিন্তু আইনের প্রাধান্য থাকবে না। (চ) সমাজের স্বার্থে রাষ্ট্র আইনের মাধ্যমে অছি-ব্যবস্থাকে নিয়ন্ত্রণ করতে পারবে।

উপরিউক্ত আলোচনার পরিপ্রেক্ষিতে অছি-ব্যবস্থার কতকগুলি গুরুত্বপূর্ণ বিষয় বিশেষভাবে প্রতিপন্ন। এই বিষয়গুলি সম্পর্কে সংক্ষেপে আলোচনা করা আবশ্যিক।

(১) ব্যক্তির প্রয়োজনের অতিরিক্ত আয় ও পুঁজিভূত ধন-সম্পত্তির ক্ষেত্রেই অছি-ব্যবস্থার প্রাসঙ্গিকতা প্রতিপন্ন হয়।

(২) অছিবাদ অনুযায়ী অতিরিক্ত সম্পদ-সম্পত্তি অছি-ব্যবস্থার আওয়ায় থাকবে ও পরিচালিত হবে।

(৪) মহাত্মা গান্ধী আধুনিককালের পুঁজিবাদী ব্যবস্থাকে সমর্থন করেন নি। সম্পত্তির উত্তরাধিকার আইনকে তিনি অস্বীকার করেছেন। তাঁর অভিমত অনুযায়ী সমাজের চূড়ান্ত অনুমোদনের মাধ্যমে অছি বা উত্তরাধিকার নির্ধারিত হবে।

(৫) অছিবাদে সম্পত্তির জাতীয়করণ বা ব্যক্তিগত সম্পত্তির বিলোপ সাধনকে স্বীকার বা সমর্থন করা হয় নি। অছিবাদে সম্পত্তির মালিকের মানসিকতা ও প্রকৃতির পরিবর্তনের কথা বলা হয়েছে। সম্পত্তি যাদের আছে, তারা নিজেদের সম্পত্তির সর্বময় কর্তা বা মালিক হিসাবে মনে করবে না। নিজেদের তারা সম্পত্তির ট্রাস্টী, অর্থাৎ অভিভাবক বা রক্ষাকর্তা হিসাবে মনে করবে। সম্পত্তি হল সামাজিক সম্পত্তি। সমাজের সকলের কল্যাণে সম্পত্তি ব্যবহৃত হবে।

(৬) অছিবাদে অধিকারের সমতার কথা বলা হয়েছে। পারিতোষিকের সমতার কথা বলা হয় নি। অধিকতর যোগ্যতাসম্পন্ন ব্যক্তির অধিকতর পরিমাণে সম্পত্তি রাখতে পারবে। মহাত্মা গান্ধী ব্যক্তি-মানুষের অধিকতর গুণগত যোগ্যতাকে অবদমিত করতে চান নি। বরং সমাজের সকলের কল্যাণে তিনি ব্যক্তি-মানুষের যোগ্যতার বা ব্যক্তিত্বের পরিপূর্ণ বিকাশ সাধনের পক্ষপাতী ছিলেন।

(৭) অছিবাদ অনুযায়ী অছি-ব্যবস্থার অধীন সম্পত্তির অপব্যবহার রোধের জন্য রাষ্ট্র কার্যকর ব্যবস্থা অবলম্বন করতে পারবে। ব্যক্তিগত সম্পত্তিকে নিয়ন্ত্রণ করার জন্য রাষ্ট্র আইন প্রণয়ন করতে পারবে।

মহাত্মা গান্ধী বিশেষ এক পরিস্থিতির পরিপ্রেক্ষিতে অছিবাদী ধ্যান-ধারণার অবতারণা করেছেন। স্বাধীন ভারতের সংবিধানের সম্ভাব্য মৌলিক অধিকারের ধারণা থেকেই অছি-ব্যবস্থা ও সম্পত্তি সম্পর্কিত গান্ধীজির ধ্যান-ধারণার উৎপত্তি হয়েছে। ১৯৩১ সালে ভারতীয় জাতীয় কংগ্রেসের করাচি অধিবেশনে গান্ধীজি একটি প্রস্তাব উত্থাপন করেন। এই প্রস্তাবে কতকগুলি বিশেষ মৌলিক অধিকারের কথা বলা হয়। বলা হয় যে ভবিষ্যতের গণতান্ত্রিক

রাষ্ট্রব্যবস্থায় মানুষ এই সমস্ত মৌলিক অধিকার ভোগ করবে। মহাত্মা গান্ধী তাঁর পরিকল্পিত গণতান্ত্রিক ও জনকল্যাণমূলক রাষ্ট্রব্যবস্থার কতকগুলি অপরিহার্য অধিকারের অস্তিত্বের কথা বলেছেন। এই অধিকারগুলি হল : (ক) প্রত্যেক মানুষের সুখম খাদ্যের অধিকার থাকবে ; (খ) সুন্দর আবাসনের অধিকার থাকবে, (গ) সন্তান-সন্ততিদের শিক্ষার সুযোগ-সুবিধার অধিকার

অছিবাদী আদর্শের
পরিপ্রেক্ষিতে

থাকবে এবং (ঘ) প্রয়োজনীয় সুচিকিৎসার ব্যবস্থা প্রত্যেকের জন্য থাকবে। গান্ধীজির মতানুসারে প্রভূত ধন-সম্পত্তি অর্জন ও অধিকার অপ্রয়োজনীয়।

যাদের এই অতিরিক্ত সম্পত্তি আছে তারা জনসাধারণের অছি হিসাবে এই সম্পত্তি রক্ষণাবেক্ষণ করবে। জনসাধারণের অভাব-অনটনের নিরসনের জন্য এই অতিরিক্ত সম্পত্তি ব্যয়িত হবে। গান্ধীজির অভিমত অনুযায়ী জগতের সবকিছুই ঈশ্বরের এবং ঈশ্বরের কাছ থেকে প্রাপ্ত। কোন ব্যক্তির সম্পদ-সম্পত্তি তার প্রাপ্য ও প্রয়োজনের অতিরিক্ত হলে সংশ্লিষ্ট ব্যক্তি সেই অতিরিক্ত সম্পত্তি অছি হিসাবে রক্ষণাবেক্ষণ করবে। কারণ কোন বিশেষ ব্যক্তির জন্য নয়, ঈশ্বরের সন্তান সকলের জন্য সেই সম্পদ-সম্পত্তি ব্যবহৃত হবে।

সমালোচনা (Criticism) : মহাত্মা গান্ধীর অছিবাদ বিরোধ-বিতর্কের উর্ধ্বে নয়। বিরুদ্ধবাদীরা অছিবাদী ব্যবস্থার বিভিন্ন বিরূপ সমালোচনা করেছেন। এই সমস্ত সমালোচনা সূত্রে অছিবাদের সীমাবদ্ধতা সম্পর্কে অবহিত হওয়া যায়।

(১) অছিবাদী আলোচনার পরিপ্রেক্ষিতে মহাত্মা গান্ধী একজন কাল্পনিক সমাজবাদী হিসাবে প্রতিপন্ন হন। সম্পদ-সম্পত্তির জন্য মানুষের উদগ্র বাসনা কত তীব্র হতে পারে সে বিষয়ে গান্ধীজির সম্যক ধারণা ছিল না। সমালোচকদের মতানুসারে অছিবাদী ধ্যান-ধারণা গান্ধীজিকে সাঁ সিনোঁ, রবার্ট ওয়েন প্রমুখ ইউরোপীয় চিন্তাবিদদের পর্যায়ভুক্ত করেছে। গান্ধীজির অছিবাদ অতিমাত্রায় অবাস্তব।

(২) অছিবাদী ব্যবস্থা ব্যক্তিগত সম্পত্তি সংরক্ষণের সপক্ষে একটি আদর্শবাদী পরিকল্পনা হিসাবে প্রতিপন্ন হয়। সমালোচকদের মতানুসারে সম্পত্তির ব্যক্তিগত মালিকানার ঋটি-বিচ্যুতিকে আড়াল করার জন্য অছিবাদী আদর্শের আশ্রয় গ্রহণ করা হয়েছে।

(৩) সমাজের অধিকাংশ মানুষের দুঃখ-দারিদ্র্যের জন্য দায়ী হল অসম বণ্টন ব্যবস্থা। অছি-ব্যবস্থার মাধ্যমে সমাজে অসম বণ্টন ব্যবস্থার অস্তিত্বকে স্বীকার করা হয়েছে এবং প্রকারান্তরে সমর্থনও করা হয়েছে।

(৪) মার্কসবাদীদের মতানুসারে অছি-ব্যবস্থা অবৈজ্ঞানিক। কারণ গান্ধীজি উপাদানের উপাদানসমূহের ব্যক্তিগত মালিকানার অবসানের কথা বলেন নি। শিল্পপতি ও পুঁজিপতিদের হাতে সম্পদ-সম্পত্তির মালিকানা থাকবে এবং তারা এই সম্পত্তির অছি হিসাবে সকলের স্বার্থে ভূমিকা পালন করবে, এ ধারণা অবৈজ্ঞানিক।

(৫) মার্কসবাদীদের আরও অভিমত হল সমাজে শ্রেণী-ব্যবস্থা বা শ্রেণী-বৈষম্য অব্যাহত থাকাকালীন অবস্থায় শ্রেণী-সম্প্রীতি বা শ্রেণী-সমঝোতা সম্ভব নয়। কারণ আর্থনীতিক স্বার্থের বৈষম্যের ভিত্তিতে শ্রেণী-বৈষম্যের সৃষ্টি হয়। মহাত্মা গান্ধী এ বিষয়টিকে উপেক্ষা করেছেন।

(৬) সমালোচকদের মতানুসারে অছিবাদী ব্যবস্থায় মানুষের মর্যাদাকে অবহেলা করা হয়েছে। সাধারণ মানুষের জীবন-মরণ ও সুখ-স্বাচ্ছন্দ্য অন্য কারও দয়া-দাক্ষিণ্যের উপর নির্ভরশীল হওয়া উচিত নয়। এ হল মানুষের মর্যাদার প্রশ্ন। অথচ মহাত্মা গান্ধীর অছি-ব্যবস্থার পরিকল্পনায় সহায়-সম্মলহীনদের সুখ-স্বাচ্ছন্দ্য সম্পদশালীদের শুভবুদ্ধির উপর ছেড়ে দেওয়া হয়েছে।

(৭) গণতান্ত্রিক সমাজবাদীরা গান্ধীজির অছিবাদী পরিকল্পনাকে সমর্থন করতে পারেন না।

কারণ তাঁরা সম্পত্তির উপর রাষ্ট্রীয় নিয়ন্ত্রণকে সমর্থন করেন। আবার মার্কসবাদী দার্শনিকরাও অছি-ব্যবস্থাকে কাল্পনিক সমাজবাদ হিসাবে সমালোচনা করেন।

(৮) পণ্ডিত জওহরলাল নেহরুও গান্ধীজির অছিবাদী ধ্যান-ধারণাকে সমর্থন করতে পারেন নি। তিনিও তাঁর ‘আত্মজীবনী’ (Autobiography)-তে অছি-ব্যবস্থার বিরূপ সমালোচনা করেছেন। অছি-ব্যবস্থার গ্রহণযোগ্যতা সম্পর্কে তিনি বিভিন্ন প্রশ্ন তুলেছেন। তিনি বলেছেন : “Is it reasonable to believe in the theory of trusteeship to give unchecked power and wealth to an individual and to expect him to use it entirely for the public good ? Are the best of us so perfect as to be entrusted in this way ? Even Plato’s philosopher kings would hardly have borne this burden worthily. And is it good for other to have even their benevolent superman over them ?”

৪.৭. রাষ্ট্র সম্পর্কে গান্ধীজির ধারণা (Gandhi’s Concept of The State)

মহাত্মা গান্ধী সুসংবদ্ধভাবে কোন স্বতন্ত্র ‘রাজনৈতিক দর্শন’ (Political Philosophy) প্রচার বা প্রতিষ্ঠা করেন নি। গান্ধীজির রাষ্ট্রচিন্তা কোন প্রতিষ্ঠিত পশ্চিমী রাষ্ট্রনৈতিক দর্শনের সঙ্গে সামঞ্জস্যপূর্ণ নয়। উদারনীতিবাদ, সমাজতন্ত্রবাদ, মার্কসবাদ, নৈরাজ্যবাদ প্রভৃতি পরিচিত কোন রাজনৈতিক মতবাদের সঙ্গে মহাত্মা গান্ধীর রাষ্ট্র-ভাবনা সামঞ্জস্য রহিত। কিন্তু গান্ধীজির সামাজিক ও রাজনৈতিক দর্শনের মধ্যে এই সমস্ত সুপরিচিত রাষ্ট্রনৈতিক মতবাদের কিছু কিছু উপাদানের অস্তিত্বের পরিচয় পাওয়া যায়। রাষ্ট্র সম্পর্কিত উদারনীতিবাদ বা আদর্শবাদের সঙ্গে গান্ধীজির রাষ্ট্রচিন্তার মিল নেই। কারণ তিনি রাষ্ট্রকে দেবতা হিসাবে প্রতিপন্ন করেন নি। আবার গান্ধীজির রাষ্ট্র-ভাবনা মার্কসবাদ বা অতি বৈপ্লবিক কোন মতবাদের সমগোত্রীয় নয়। কারণ তিনি রাষ্ট্রীয় প্রতিষ্ঠানের অবলুপ্তির কথা বলেন নি। বিভিন্ন চিন্তাবিদ ও মনীষীর মতাদর্শ ও ধ্যান-ধারণাকে তাঁর ব্যক্তিগত অভিজ্ঞতার আলোকে নতুন করে বাস্তবে রূপায়িত করার চেষ্টা করেছেন। গান্ধীজির সামাজিক, রাজনৈতিক, অর্থনৈতিক ও নৈতিক জীবনের সমস্যাগুলি সম্পর্কিত ব্যক্তিগত ধ্যান-ধারণা ও অভিজ্ঞতাই রাষ্ট্রচিন্তার রূপ নিয়েছে। মহাত্মা গান্ধী দক্ষিণ আফ্রিকায় রাষ্ট্রীয় প্রতিষ্ঠানের অমানুষিক ভূমিকা স্বচক্ষে প্রত্যক্ষ করেছেন। আবার ঔপনিবেশিক ব্রিটিশ শক্তির শাসনাধীন ভারতবর্ষে রাষ্ট্রযন্ত্রের পীড়নমূলক প্রকৃতির পরিচয় তিনি পেয়েছেন। এ সবার ভিত্তিতেই গড়ে উঠেছে গান্ধীজির রাষ্ট্রচিন্তার কাঠামো।

মহাত্মা গান্ধী সত্য ও অহিংসার পূজারী হিসাবে পরিচিত। এই দুটি আদর্শ তাঁর ব্যক্তিগত ও সমগ্র রাজনৈতিক মতাদর্শকে নিয়ন্ত্রণ করেছে। তাঁর রাষ্ট্র সম্পর্কিত ধারণার মূল ভিত্তি হল অহিংসা নীতি। তাঁর মতে হিংসা হল এক অশুভ শক্তি। হিংসার ভিত্তিতেই বলপ্রয়োগের ঘটনা ঘটে। গান্ধীজি বলপ্রয়োগের নীতিতে বিশ্বাস করতেন না। গান্ধীজির রাষ্ট্রচিন্তার উপর টলস্টয়

সত্য ও অহিংসা (Tolstoy)-এর গভীর প্রভাব পড়েছে। মহাত্মার একান্ত সচিব ও জীবনীকার হিসাবে সুবিদিত প্যারেলাল (Pyarelal) মন্তব্য করেছেন :

“Tolstoy moulded Gandhiji’s whole outlook on life. His views on art, religion and economics.....no less than on politics were profoundly influenced by Tolstoy.” এই কারণে গান্ধীজির রাষ্ট্রচিন্তায় নৈরাজ্যবাদী ধারণার অস্তিত্ব দেখা যায়। তা ছাড়া গান্ধীজির রাষ্ট্রচিন্তার উপর থোরো (David Thoreau)-র প্রভাবও কম নয়। ১৯০৮ সালে লিখিত ‘হিন্দু স্বরাজ’ গ্রন্থে মহাত্মার রাষ্ট্র সম্পর্কিত চিন্তার প্রথম প্রকাশ ঘটে।

মহাত্মার মতে বলপ্রয়োগই হল আধুনিক রাষ্ট্রের ভিত্তি। সহিংস বলপ্রয়োগের মাধ্যমে রাষ্ট্র তার অস্তিত্ব বজায় রাখে। তাঁর মতে রাষ্ট্র হল কেন্দ্রীভূত এবং সুসংগঠিতভাবে হিংসা ও বলপ্রয়োগের মূর্ত প্রকাশ। তিনি বলেছেন : “The state represents violence in a concentrated and organised form. The individual has a soul, but the state is a soulless machine ; it can never be weaned from violence to which it owes its very existence.” আধুনিক অমিত শক্তিদ্বারা রাষ্ট্রকে তিনি ভয়ের চোখে দেখেছেন। তাঁর মতে এই রাষ্ট্রে মানুষের ব্যক্তিত্বের অপমৃত্যু ঘটে এবং মানব সমাজের সমূহ সর্বনাশ হয়। রাষ্ট্র মানুষের সার্বিক বিকাশের পরিপন্থী। গান্ধীজি বলেছেন : “I look upon an increase in the power of the state with greatest fear, because while although apparently doing good by minimising exploitation, it does the greatest harm to mankind by destroying the individuality which lies at the root of all progress.”

মহাত্মা গান্ধী রাষ্ট্রের ক্ষমতা বৃদ্ধির বিষয়টিকে ভয়ের চোখে দেখেছেন। কারণ রাষ্ট্র ব্যক্তি-মানুষের ব্যক্তিত্বকে বিনষ্ট করে। অথচ সমাজের যাবতীয় উন্নতি ও বিকাশের মূলে ব্যক্তির রাষ্ট্রের বিরোধিতা

ভূমিকাই বর্তমান। ব্যক্তি প্রাণময়, কিন্তু রাষ্ট্র প্রাণহীন। প্রাণহীন রাষ্ট্রযন্ত্র ব্যক্তিত্বের বিনাশ ঘটিয়ে মানুষের সর্বাধিক ক্ষতি সাধন করে। গান্ধীজির মতানুসারে রাষ্ট্র হল সর্বাধিক সংগঠিত হিংসার অভিব্যক্তি। শারীরিক বলপ্রয়োগ ছাড়াও সামাজিক ও আর্থনীতিক ক্ষেত্রে হিংসার প্রয়োগ পরিলক্ষিত হয়। রাষ্ট্র কিন্তু শারীরিক বলপ্রয়োগ সম্বৃত হিংসা প্রয়োগ করে থাকে। রাষ্ট্রীয় হিংসা সীমাহীন। এবং এই হিংসার উপরই রাষ্ট্রের অস্তিত্ব নির্ভরশীল। স্বভাবতই হিংসা থেকে রাষ্ট্রের মুক্তি অসম্ভব। সুতরাং রাষ্ট্র হল মানুষের সমাজব্যবস্থার পক্ষে অকল্যাণকর ও ক্ষতিকর একটি প্রতিষ্ঠান। রাষ্ট্র শারীরিক শক্তিতে শ্রেষ্ঠ, কিন্তু বুদ্ধি ও সততায় শ্রেষ্ঠ নয়। গান্ধীজি ঐতিহাসিক, নৈতিক, দার্শনিক, আর্থনীতিক, রাজনীতিক প্রভৃতি সকল দিক থেকেই রাষ্ট্রের উপযোগিতার বিষয়টিকে একেবারে নস্যাত্ন করে দিয়েছেন। তাঁর মতানুসারে হিংসা ও শোষণের যন্ত্র রাষ্ট্র মানুষের সেবা ও আত্মত্যাগের আদর্শ ও মানসিকতাকে ধ্বংস করে দেয়। রাজনীতিক কর্তৃপক্ষের বাধ্যতামূলক প্রকৃতি মানবিক কাজকর্মের নৈতিক মূল্যকে অগ্রাহ্য করে। তার ফলে নৈতিক মূল্যবোধের অপমৃত্যু ঘটে। মানবিক সচেতনতা ও বিবেকবোধ থেকে যে মূল্যবোধের সৃষ্টি হয়, রাষ্ট্র তাকে ধ্বংস করে। গান্ধীজির অভিমত অনুযায়ী শ্বেতাঙ্গদের সামরিক শাসন বা কৃষ্ণাঙ্গদের জঙ্গী বিধি-ব্যবস্থা ক্ষতিকারক। এই সকল কারণে গান্ধীজি রাষ্ট্র-বিরোধী। বস্তুত গণ-মুক্তির স্বার্থে গান্ধীজি রাষ্ট্রের বিরোধিতা করেছেন।

মহাত্মা গান্ধী ব্যক্তিসত্তার উপর যথেষ্ট গুরুত্ব আরোপ করেছেন। তাঁর মতে ব্যক্তিই হল কর্তৃত্ব ও মূল্যবোধের কেন্দ্রবিন্দু। সমাজের মৌলিক উদ্দেশ্য হল ব্যক্তির নৈতিক বিকাশ সাধন। ব্যক্তির স্বার্থ রক্ষার উদ্দেশ্যেই কর্তৃত্বের বিকাশ ও প্রয়োগের কথা বলা হয়। অতএব ব্যক্তি ব্যতিরেকে সমাজের অবশিষ্ট আর কিছু থাকে না। ব্যক্তি-মানুষের ব্যক্তিত্বের বিকাশের পথে রাষ্ট্র ও তার ভূমিকা প্রতিবন্ধক হিসাবে প্রতিপন্ন হয়। রাষ্ট্রের চরম ও চূড়ান্ত সার্বভৌম শক্তির ধারণাকে তিনি সমর্থন করেন নি। গান্ধীজি জনগণের সার্বভৌমিকতায়

বিশ্বাসী ছিলেন। তবে তা পরিপূর্ণ নৈতিক কর্তৃত্বের উপর প্রতিষ্ঠিত হওয়া দরকার। রাষ্ট্র সমাজের অন্যান্য প্রতিষ্ঠানের মত জনসাধারণের কাছে কেবল সীমাবদ্ধ আনুগত্য পেতে পারে। এতে নৈরাজ্যের আশঙ্কা আছে। তবুও গান্ধীজি রাষ্ট্রীয় ক্ষমতার অপপ্রয়োগ রোধ করার জন্য এই মত পোষণ করেছেন। গান্ধীজির মতানুসারে জনগণই হল মূল, রাষ্ট্র ফল মাত্র। মূলটি যদি সুমধুর হয়, ফল সুমিষ্ট হবে। মহাত্মা বলেছেন : “People are the roots, the state is fruit. If the roots are sweet, the fruits are bound to be sweet.” মহাত্মা গান্ধী রাষ্ট্রের চরম সার্বভৌমিকতার বিরোধিতা করেছেন। এই বিরোধিতার পিছনে

বিবিধ কারণ বর্তমান। এই বিবিধ কারণ হল : (১) গান্ধীজি জনসাধারণের নৈতিক সার্বভৌমত্বের উপর বিশেষ গুরুত্ব আরোপ করেছেন। আইনানুগ সার্বভৌমিকতার সংগঠিত শক্তির বিরুদ্ধে তিনি জনসাধারণের নৈতিক সার্বভৌমিকতাকে প্রাধান্য দিয়েছেন। (২) গান্ধীজি মানুষের অভ্যন্তরীণ ও নীতিগত বিবেকবোধের শ্রেষ্ঠত্বের উপর বিশেষ গুরুত্ব আরোপ করেছেন। তিনি রাষ্ট্রের সংগঠিত শক্তির শ্রেষ্ঠত্বকে স্বীকার করেন নি। (৩) সর্বোপরি গান্ধীজি পার্থিব কর্তৃত্বের পরিবর্তে আধ্যাত্মিক কর্তৃত্বের প্রাধান্যের উপর জোর দিয়েছেন।

গান্ধীজির মতে রাষ্ট্র নিজেই নিজের লক্ষ্য হতে পারে না। রাষ্ট্র হল সমাজের সকলের সর্বাধিক মঙ্গল বিধানের উপায়বিশেষ। রাষ্ট্রনৈতিক কর্তৃত্বকে তিনি ব্যক্তিজীবনের বিকাশের শর্ত হিসাবে গণ্য করেছেন। তিনি বলেছেন : “(The state is) Not an end in itself but as one of the means of enabling people to better their condition in every department of life.” রাষ্ট্রকে কোন পবিত্র প্রতিষ্ঠান হিসাবে গণ্যমান্য করার কারণ নেই। রাষ্ট্র জনগণের কল্যাণ সাধনের একটি উপায় মাত্র। সুতরাং রাষ্ট্রীয় ক্ষমতার কোন রকম অপপ্রয়োগ ঘটলে ব্যক্তির নৈতিক অধিকার আছে অহিংস ও সত্যগ্রহের মাধ্যমে রাষ্ট্রীয় আইনকে প্রতিরোধ করার। মানুষের নৈতিক মূল্যবোধের বিরোধী আইনকানুন অমান্য করা গান্ধীজির মতে নাগরিকের অধিকার ও পবিত্র কর্তব্য। তবে বিশৃঙ্খলার আশঙ্কাকে এড়ানোর জন্য প্রতিরোধের পদ্ধতি হবে পুরোপুরি অহিংস।

রাষ্ট্রের সদর্থক ভূমিকাকে গান্ধীজি সম্পূর্ণভাবে অস্বীকার করেন নি। সুসংগঠিত একটি শাসনব্যবস্থার সাহায্যে সমাজের প্রতি ন্যায়সঙ্গত কর্তব্য সম্পাদন রাষ্ট্রের কাজ। এ ধরনের শাসনব্যবস্থার প্রতি মানুষ আনুগত্য দেখাবে। মানুষের কল্যাণে সম্পাদিত রাষ্ট্রের সকল কাজকর্মকে গান্ধীজি স্বাগত জানিয়েছেন। তবে এ পথে রাষ্ট্রের ভূমিকা ব্যক্তির স্বাধীনতার পরিপন্থী হলে তা প্রতিরোধ করতে হবে। রাষ্ট্রের স্বৈরাচারী হওয়ার আশঙ্কা আছে। রাষ্ট্রকে সংযত করবে সমাজ। রাষ্ট্র-স্বৈরাচারের সম্ভাবনাকে প্রতিহত করতে না পারলে ব্যক্তির স্বাধীনতা বিপন্ন হবে। ব্যক্তির জীবনে রাষ্ট্রের হস্তক্ষেপ যথাসম্ভব কম হওয়া উচিত। মহাত্মা গান্ধীর মতানুসারে রাষ্ট্র কোন স্থায়ী প্রতিষ্ঠান নয়। আগামী দিনের সমাজে উপনীত হওয়ার উপায় হল রাষ্ট্র। সমাজের উর্ধ্বে রাষ্ট্র নয়। সমাজের মধ্যেই রাষ্ট্র অবস্থিত। রাষ্ট্র হল একটি রাজনীতিক সংস্থা। মানুষই এই সংস্থাটিকে সৃষ্টি করেছে। মহাত্মা গান্ধী উদ্দেশ্য ও উপায় অর্থাৎ লক্ষ্য ও পথের মধ্যে সামঞ্জস্য সাধনের কথা বলেছেন। তাঁর অভিমত অনুসারে অশুভ পথে শুভ লক্ষ্যে উপনীত হওয়া যায় না।

ব্যক্তি-স্বাতন্ত্র্যবাদীদের মত গান্ধীজি রাষ্ট্রের কার্যাবলীর পরিধিকে সীমিত করার পক্ষপাতী। তাঁর মতে রাষ্ট্রের কার্যাবলীর মধ্যে শুভ বা পবিত্র কিছু নেই। তাঁর ধারণা মানুষের দুর্বলতার জন্যই রাষ্ট্রের সৃষ্টি হয়েছে। তিনি স্বৈচ্ছামূলক প্রতিষ্ঠানসমূহের হাতে রাষ্ট্রের অধিকাংশ দায়িত্বকে ন্যস্ত করতে চেয়েছেন। বলপ্রয়োগমূলক প্রতিষ্ঠান হিসাবে রাষ্ট্রকে তিনি সন্দেহের চোখে দেখেছেন। তাঁর মতে রাষ্ট্র সর্বাপেক্ষা কম শক্তি প্রয়োগ করে তার কাজ সম্পাদন করবে। গান্ধীজির দৃঢ় ধারণা রাষ্ট্রের ক্ষমতা বৃদ্ধি মানুষের মঙ্গলের পরিবর্তে অমঙ্গলকেই ডেকে আনে। তিনি বলেছেন : “I look upon the increase in the power of the state with the greatest fear, because although while apparently doing good by minimising exploitation, it does the greatest harm to mankind by destroying individuality, which lies at the root of all progress.” এই কারণে গান্ধীজি রাষ্ট্রের উপর ন্যূনতম কাজের দায়িত্ব ন্যস্ত করার পক্ষপাতী। তিনি ডেভিড থোরোকে অনুসরণ করে বলেছেন : “...that government is best which governs least.”

রাষ্ট্রের প্রকৃতি

এই সমস্ত কারণে ড. বিনয় সরকার, উডকক্ (George Woodcock), ড. গোপীনাথ ধাওয়ান (Dr. Gopinath Dhawan) প্রমুখ গান্ধীজিকে নৈরাজ্যবাদী বলে অভিহিত করেছেন। এক্ষেত্রে তাঁরা গান্ধীজির উপর টলস্টয়ের সুস্পষ্ট প্রভাবের কথা উল্লেখ করেছেন। কিন্তু প্রকৃত বিচারে গান্ধীজিকে নৈরাজ্যবাদী বলা যায় না। ড. বিনয় বিহারী মজুমদার, স্প্রাট (P. Spratt), ড. পাওয়ার (Dr. Power) প্রমুখ চিন্তাবিদ গান্ধীজিকে নৈরাজ্যবাদী বলার বিরোধী।

মহাত্মা গান্ধীর মতানুসারে রাষ্ট্র হল প্রচলিত বস্তুবাদী সভ্যতার প্রতীক। সরকার, পার্লামেন্ট, আদালত প্রভৃতি হল রাষ্ট্রের এজেন্ট। এগুলিকে গান্ধীজি অগ্রগতির উপায় হিসাবে গণ্য করেন নি। তিনি পার্লামেন্টের বিরূপ সমালোচনা করেছেন। সংসদীয় গণতন্ত্রের সমালোচনা করতে গিয়ে তিনি পার্লামেন্টকে ‘বন্ধ্য নারী’ হিসাবে অভিহিত করেছেন। কারলাইল (Carlyle) - এর মত তিনি ‘বকম বাজির আখড়া’ (talking shop) হিসাবে উপহাস করেছেন। তাঁর

সংসদীয় গণতন্ত্রের
সমালোচনা

মতানুসারে পার্লামেন্ট হল ভড়ংবাজ ও ধান্দাবাজদের এক প্রতিষ্ঠান।

এই প্রতিষ্ঠানটি কখনই নিজে থেকে মানুষের কোন মঙ্গল করে নি। কারণ

সংসদ সব সময় অস্থিরচিন্ততা ও অনিশ্চয়তায় ভোগে। সংসদের

সমালোচনা করতে গিয়ে হিন্দু স্বরাজ শীর্ষক রচনায় গান্ধীজি বলেছেনঃ “Today it is under Mr. Asquith, tomorrow it may be under Mr. Balfour.... what is done today may be undone tomorrow. It is not possible to recall a single instance in which finality can be predicted for its work.” রাজনীতি আর সরকারের চরম সমালোচনা করে তিনি মন্তব্য করেছেন যে রাজনীতিবিদরা পুরোপুরি স্বার্থচিন্তা আর সংরক্ষণে ব্যস্ত। সেইমত জনমত তারা তৈরী করে আর নিজেদের কাজে লাগায়। জনপ্রতিনিধিদের ও জনগণের মাঝখানে থাকে এক জটিল আইনী বেড়াঝাল, জনগণ আর তাদের প্রতিনিধিদের মধ্যে গড়ে ওঠে দূরত্বক্রম্য ফাঁক।

মহাত্মা গান্ধী একেবারে নতুন ধরনের এক সামাজিক ও রাজনীতিক ব্যবস্থা প্রবর্তনের পক্ষপাতী ছিলেন। এই ব্যবস্থায় পরিপূর্ণ ন্যায় ও সাম্য প্রতিষ্ঠিত হবে। এই আদর্শ সমাজব্যবস্থায় রাজপুত্র ও দেউলিয়ার মধ্যে, ব্যারিস্টার ও ঝাড়ুদারের মধ্যে কোন রকম বৈষম্য থাকবে না। এমনকি পথের কুকুরও ন্যায়বিচার পাবে। এই সমাজ হবে শ্রেণীহীন। এই সমাজে হিংসার প্রতীক রাষ্ট্রের কোন স্থান নেই। এক আদর্শ রাষ্ট্রনৈতিক ব্যবস্থার পরিকল্পনা করতে গিয়ে গান্ধীজি রাষ্ট্রবিহীন গণতন্ত্র (Stateless Democracy)-এর কথা বলেছেন। অহিংস নীতির উপর প্রতিষ্ঠিত এই রাষ্ট্রনৈতিক ব্যবস্থায় শোষণহীন সমাজের সৃষ্টি হবে। কারণ সমাজ থেকে হিংসা দূর করতে পারলে সবরকম শোষণের অবসান হবে। এ রকম অহিংস সমাজে সকলের

রামরাজ্য

জন্য সমান সুযোগ-সুবিধা থাকবে, সাম্যনীতি বাস্তবে রূপায়িত হবে এবং

প্রকৃত গণতন্ত্র প্রতিষ্ঠিত হবে। মহাত্মা গান্ধী ক্ষমতার বিকেন্দ্রীকরণ ও

সাম্যভিত্তিক শ্রেণীহীন সমাজের কথা বলেছেন। প্যারেলাল (Pyarelal) মন্তব্য করেছেন :

“Gandhiji was a firm believer in a classless, egalitarian society in which there would be no distinction of rich and poor, high and low.” গান্ধীজির এই সাম্যভিত্তিক শ্রেণীহীন ও শোষণহীন সমাজ অহিংস নীতির উপর প্রতিষ্ঠিত। তিনি শ্রেণী-সংগ্রামের পথ পরিহার করে শ্রেণী সহযোগিতার নীতি গ্রহণ করতে বলেছেন। এই সমাজব্যবস্থায় কোন রাষ্ট্র থাকবে না এবং কোন রাজনৈতিক ক্ষমতাও থাকবে না। রাষ্ট্রবিহীন এই অহিংস গণতন্ত্রই হল গান্ধীজির ভাষায় রামরাজ্য। গান্ধীজির মতানুসারে রামরাজ্য হবে পৃথিবীতে ঈশ্বরের রাজত্ব। এই রাজত্বে জনগণের নৈতিক কর্তৃত্বের সার্বভৌমত্ব প্রতিষ্ঠিত হবে। এই রাজত্বে হিংসার কাঠামো হিসাবে রাষ্ট্রের অবসান ঘটবে। গান্ধীজির রামরাজ্যের ধারণা ব্যাখ্যা করতে গিয়ে অধ্যাপক ভার্মা (V. P. Varma) তাঁর *Political Philosophy of Mahatma*

Gandhi and Sarvodaya শীর্ষক গ্রন্থে বলেছেন : “Ramrajya means the realisation of universal peace and humanitarian ethics...The realisation of the Kingdom of God would depend however, on a sincere faith in the supreme spirit by millions ...this Ramrajya will be more cohesive than the formal bonds of legal organisation.” এখানে সমাজ-জীবন স্ব-নিয়ন্ত্রিতভাবে পরিচালিত হবে। স্ব-আরোপিত বিধিবিধান, নৈতিক মূল্যবোধ এবং সংযমই হবে এই সমাজব্যবস্থার চালিকা শক্তি। এখানে প্রত্যেকে তার নিজের প্রভু। এমনভাবে প্রত্যেকে নিজেকে পরিচালিত করবে যাতে অপরের ক্ষেত্রে কোন রকম প্রতিবন্ধকতা দেখা না দেয়। কোন রকম ক্ষমতার দ্বন্দ্বের প্রশ্ন এই আদর্শ ব্যবস্থায় দেখা দেবে না। এখানে সকলের জন্য একই প্রকার স্বাধীনতা থাকবে। এই সমাজব্যবস্থায় সকল ক্ষেত্রে সাম্য ও ক্ষমতার বিকেন্দ্রীকরণ বজায় থাকবে।

মহাত্মা গান্ধী মার্কসীয় দর্শনের মত রাষ্ট্রের একেবারে অবলুপ্তির কথা বলেন নি। তাঁর অভিমত অনুযায়ী সমাজে রাষ্ট্রের অস্তিত্ব অব্যাহত থাকবে। কিন্তু এই রাষ্ট্র হবে সম্পূর্ণরূপে এক অহিংস সংগঠন। এবং এই রাষ্ট্রের কর্মক্ষেত্রের পরিধি অতিমাত্রায় সঙ্কুচিত হবে। তিনি গান্ধীজির রাষ্ট্র আরও বলেছেন যে, ভারী শিল্প ও পরিবহণ ব্যবস্থা, বিশাল আকার-আয়তনের যন্ত্রপাতি, সৈন্যবাহিনী, পুলিশ বাহিনী, আমলাবাহিনী, বড় বড় হাসপাতাল প্রভৃতি প্রতিষ্ঠান সমাজে থাকবে। কিন্তু এই সমস্ত প্রতিষ্ঠানের উদ্দেশ্য জনসাধারণের কল্যাণ সাধন ; ব্যক্তি-মানুষের ব্যক্তিত্বের বিনাশ সাধন নয়। জনসাধারণের নৈতিক কর্তৃত্বের সার্বভৌমত্ব প্রতিষ্ঠিত হবে। পৃথিবীতে ঈশ্বরের রাজ্য কায়েম হবে। হিংসার কাঠামো হিসাবে রাষ্ট্রের অবসান ঘটবে।

গান্ধীজির রাষ্ট্র পরিকল্পনার দুটি মূল কথা হল বিকেন্দ্রীকরণ ও স্বাবলম্বন। গান্ধীজির এই রামরাজ্য বিকেন্দ্রীকরণ নীতির উপর প্রতিষ্ঠিত এবং গ্রামভিত্তিক হবে। সত্যগ্রহী গ্রামগুলি সত্য ও অহিংসার ভিত্তিতে গঠিত হবে। এই সমস্ত গ্রামের সমবায়ই হল গান্ধীজির পরিকল্পিত রাষ্ট্রহীন গণতন্ত্রের বাস্তব রূপ। গান্ধীজির স্বপ্নের ‘রামরাজ্য’ বলতে রাষ্ট্রবিহীন অহিংস গণতন্ত্রকেই বোঝায়। সম্পূর্ণ স্বৈচ্ছামূলক ভিত্তিতে এই সংগঠন গড়ে উঠবে। সমাজজীবনে ক্ষমতার বিকেন্দ্রীকরণ ও সাম্য বর্তমান থাকবে। প্রত্যেক ব্যক্তি তার ক্ষুধিবৃত্তির জন্য পরিশ্রম (bread labour) করবে। প্রত্যেকে সামর্থ্য অনুসারে সমাজের জন্য কাজ করবে। তবে এ রকম এক আদর্শ ব্যবস্থার পরিপূর্ণ বাস্তবায়ন সম্ভব কিনা এ বিষয়ে গান্ধীজি সন্দেহান্বিত ছিলেন। পঞ্চায়েতী রাজের ভিত্তিতে এই বিকেন্দ্রীভূত সমাজব্যবস্থা পরিচালিত হবে। পঞ্চায়েতের মাধ্যমে স্ব-শাসিত এই গ্রামীণ সমাজ হবে স্ব-নির্ভর বা স্বয়ংসম্পূর্ণ। গ্রামীণ প্রশাসনের সম্পূর্ণ ক্ষমতা এই গ্রাম পঞ্চায়েতের হাতে থাকবে। গান্ধীজির মতানুসারে অহিংস সমাজে কোন কেন্দ্রীকরণ থাকতে পারে না। রাষ্ট্রনৈতিক ক্ষমতার বিকেন্দ্রীকরণ ছাড়াও গান্ধীজি তাঁর আদর্শ সমাজে অর্থনৈতিক ক্ষেত্রে বিকেন্দ্রীকরণের কথা বলেছেন। তিনি অর্থনৈতিক ক্ষমতা ও সম্পদ-সামগ্রীর বিকেন্দ্রীকরণের মাধ্যমে ব্যক্তির নৈতিক ও মানসিক সুখ-স্বাচ্ছন্দ্য বিধানের কথা বলেছেন। গান্ধীজি বলেছেন : “আমার কল্পনায় গ্রামস্বরাজ হল একটি পরিপূর্ণ প্রজাতন্ত্র।” তিনি এর নাম দিয়েছেন গ্রামীণ প্রজাতন্ত্র। এই প্রজাতন্ত্রগুলির সমবায়ই গঠিত হবে রাষ্ট্র। মহাত্মা গান্ধী *Young India* শীর্ষক রচনায় বলেছেন : “By Ramrajya I do not mean Hinduraj. I mean by Ramrajya divineraj, the kingdom of God... the ancient ideal of Ramrajya is one true of democracy.”

গান্ধীজি প্রেম-প্রীতির মাধ্যমে সামাজিক সাম্য ও সংহতি সংরক্ষণের কথা বলেছেন। কৃষি ও শিল্পের ক্ষেত্রে তিনি আধুনিকীকরণ ও বৃহদায়তন ব্যবস্থার বিরোধী। তিনি বৃহদায়তন শিল্প,

ব্যাপক উৎপাদন, ভারী যন্ত্রপাতি, আধুনিক বৃহৎ শহর, আধুনিক শিক্ষা ব্যবস্থা, আধুনিক চিকিৎসা ব্যবস্থা প্রভৃতির বিরোধিতা করেছেন। তিনি কুটির শিল্প ও শ্রমনিবিড় উৎপাদন ব্যবস্থার পক্ষপাতী। তাঁর মতে মানুষ, পশু ও প্রকৃতির মধ্যে ভারসাম্য থাকা দরকার।

মহাত্মা গান্ধী নৈরাজ্যবাদীদের মত এক নতুন ধরনের সামাজিক ব্যবস্থা গড়ে তোলার পক্ষপাতী ছিলেন। এই নতুন সমাজব্যবস্থায় সকলের জন্য সম্পূর্ণ স্বাধীনতা, সাম্য ও ন্যায়বিচার সুনিশ্চিত হবে। এই সমাজে ক্ষমতা ও কর্তৃত্বের কোন রকম অপব্যবহার কোন ক্ষেত্রে ঘটলে তা প্রতিহত করার সামর্থ্য মানুষের থাকবে। তবে এই প্রতিবাদ হবে অহিংসা ও সত্যগ্রহের পথে। এ ধরনের এক সমাজ ব্যবস্থা বাস্তবে গড়ে তোলা সম্ভব হবে কি না সে বিষয়ে গান্ধীজির মনে সন্দেহ-সংশয় ছিল। এমন আশংকা তিনি প্রকাশ করেছেন যে এ ধরনের এক আদর্শ সমাজজীবন হয়ত বাস্তবে অধরাই থেকে যাবে। তবে এ রকম আদর্শ সমাজজীবনের পথের সন্ধান তিনি দিয়েছেন। জি. এন. ধাওয়ান (G.N. Dhawan) তাঁর *The Political Philosophy of Mahatma Gandhi* শীর্ষক গ্রন্থে এ প্রসঙ্গে মন্তব্য করেছেন : “(Gandhiji) indicates the direction rather than the destination, the process rather than the consummation. The structure of the state that will emerge as a result of the non-violent revolution will be a compromise, a via media, between the ideal non-violent society and the facts of human nature.”

সমালোচনা (Criticism) : আধুনিক রাষ্ট্রবিজ্ঞানের আলোচনায় বিভিন্ন দৃষ্টিভঙ্গির পরিপ্রেক্ষিতে গান্ধীজির রাষ্ট্রচিন্তার বিরূপ সমালোচনা করা হয়।

(১) অনেকের মতে রাষ্ট্র সম্পর্কে গান্ধীজির ধারণা স্ব-বিরোধী। একদিকে তিনি রাষ্ট্রবিহীন গণতন্ত্রের কথা বলেছেন, আবার অপরদিকে রাষ্ট্রের হাতে সর্বাপেক্ষা কম ক্ষমতা প্রদানের তত্ত্ব প্রচার করেছেন। ন্যায় বিচার প্রতিষ্ঠা ও অপরাধপ্রবণতা হ্রাস করার স্ব-বিরোধী ক্ষেত্রেও তিনি রাষ্ট্রের ইতিবাচক ভূমিকার ইঙ্গিত দিয়েছেন। অর্থাৎ গান্ধীজির রাষ্ট্রচিন্তার মধ্যে স্ব-বিরোধিতা বর্তমান।

(২) গান্ধীজির ‘রামরাজ্য’ এক অবাস্তব পরিকল্পনা হিসাবে সমালোচনা করা হয়। সত্য ও অহিংসার ভিত্তিতে এক আদর্শ সমাজ ব্যবস্থা বা গান্ধীজির পরিকল্পিত রামরাজ্য নিতান্তই কল্পলোকের বিষয়। রামরাজ্যের আদর্শ বাস্তবে রূপায়িত করা কার্যত অসম্ভব। বর্তমান বিশ্বের অতিমাত্রায় জটিল প্রকৃতির সমস্যাটির মোকাবিলায় ক্ষেত্রে গান্ধীজি পরিকল্পিত সমাজব্যবস্থার সীমাবদ্ধতা অনস্বীকার্য। বস্তুত তিনি নিজেও এ রকম সমাজব্যবস্থা প্রতিষ্ঠা সম্বন্ধে সন্দিহান ছিলেন।

(৩) রাষ্ট্রের প্রকৃতি সম্পর্কিত গান্ধীজির মূল্যায়ন একদেশদর্শিতা দোষে দুষ্ট। নৈরাজ্যবাদীদের মত তিনি রাষ্ট্রকে শোষণ-পীড়নের হাতিয়ার হিসাবে দেখেছেন। রাষ্ট্রের ক্রটি ও সীমাবদ্ধতা আছে। এ কথা ঠিক। তেমনি এ কথাও ঠিক যে, রাষ্ট্র মানুষ ও মানবসমাজের মঙ্গলের জন্যও কাজ করে। রাষ্ট্র ব্যক্তি-স্বাধীনতার বিরোধী। অনুরূপভাবে আবার রাষ্ট্র মানুষের নিরাপত্তা ও কল্যাণের জন্যও কাজ করে। বস্তুত সভ্য ও সুস্থ সমাজ জীবনের স্বার্থে রাষ্ট্রের ভূমিকার অপরিহার্যতা অনস্বীকার্য।

(৪) গান্ধীজি ব্যক্তিসত্তার উপর যথেষ্ট গুরুত্ব আরোপ করেছেন। তিনি ব্যক্তিকে সমাজের উর্ধ্ব স্থান দিয়েছেন। কিন্তু সমাজই ব্যক্তির উর্ধ্ব—ব্যক্তি সমাজের উর্ধ্ব নয়। প্রকৃত প্রস্তাবে সমাজের সদস্য হিসাবে রাষ্ট্রের সাহায্যেই ব্যক্তি-মানুষের ব্যক্তিত্বের পরিপূর্ণ বিকাশ ঘটে। তা ছাড়া গান্ধীজি ব্যক্তির নৈতিক স্বাধীনতার কথা বলেছেন। কিন্তু বাস্তবে সমাজ বা রাষ্ট্র নিরপেক্ষভাবে নৈতিক স্বাধীনতার উপলব্ধি ব্যক্তির পক্ষে অসম্ভব।

(৫) মানব চরিত্র সম্পর্কিত গান্ধীজির ধারণা অতিমাত্রায় আদর্শবাদী। গান্ধীজি মানব প্রকৃতি প্রসঙ্গে উন্নত ধারণা পোষণ করতেন। কিন্তু বাস্তবে তা অসম্ভাবিক ও অসম্ভব প্রতিপন্ন হয়। মানুষ সামাজিক ও যুক্তিবাদী; মানুষের মধ্যে সহযোগিতামূলক প্রকৃতি বর্তমান। অনুরূপভাবে

আবার মানুষের মধ্যে স্বার্থপরতাও সীমাহীন। মানুষের মধ্যে সদ্ভাব-সম্প্রীতি

যেমন আছে, তেমনি মানুষের মধ্যে প্রতিযোগিতার প্রবণতাও প্রবল। মহাত্মা গান্ধী একজন আদর্শবাদীর মত মানুষের কেবল সুকুমার বৃত্তিগুলিকেই দেখেছেন এবং তার উপরই গুরুত্ব আরোপ করেছেন। মানবচরিত্রের হীন দিকগুলিকে তিনি উপেক্ষা করেছেন। গান্ধীজি মানব প্রকৃতির পরিবর্তনের উপর মাত্রাতিরিক্ত গুরুত্ব আরোপ করেছেন।

(৬) গান্ধীজির অর্থনৈতিক দৃষ্টিভঙ্গি রক্ষণশীলতা দোষে দুষ্ট। এক্ষেত্রে তাঁর মতবাদ আধুনিক উন্নতিশীল শিল্পোন্নত দেশের আর্থিক নীতি ও কাঠামোর সঙ্গে সামঞ্জস্যহীন। শিল্পোন্নয়ন ও

আধুনিকতা বিরোধী গান্ধীজির অর্থনৈতিক পরিকল্পনা বর্তমানে সমর্থন করা হয় না। অনেকের মতে গান্ধীজির নীতি মানব-সভ্যতার অগ্রগতির পরিপন্থী। শিক্ষাব্যবস্থা এমনকি চিকিৎসা-ব্যবস্থার ক্ষেত্রেও গান্ধীজির উন্নত আধুনিক ব্যবস্থার বিরোধিতা বিরূপ সমালোচনার সম্মুখীন হয়েছে।

(৭) মার্কসবাদীরা রাষ্ট্র সম্পর্কে গান্ধীজির ধারণার কঠোর সমালোচনা করেন। গান্ধীজির মতে রাষ্ট্র কোন স্বৈচ্ছাপ্রণোদিত প্রতিষ্ঠান নয় এবং রাষ্ট্র কোন বিশেষ শ্রেণীর স্বার্থসাধন করে না। কিন্তু মার্কসবাদীদের মতে রাষ্ট্র হল শ্রেণী-শাসনের যন্ত্র ; রাষ্ট্রের মাধ্যমে এক শ্রেণী অন্য শ্রেণীকে শোষণ করে। অর্থনৈতিক দিক থেকে সমাজের প্রতিপত্তিশালী শ্রেণী রাষ্ট্রীয় ক্ষমতা দখল করে এবং পুরোপুরি নিজেদের শ্রেণী-স্বার্থ সংরক্ষণের জন্য তা ব্যবহার করে। গান্ধীজি রাষ্ট্রের এই শ্রেণী-চরিত্রকে অস্বীকার করেছেন।

(৮) গান্ধীজি অহিংস আন্দোলনে আস্থাশীল। তিনি অহিংস সংগ্রামে ও সত্যগ্রহের মাধ্যমে ক্ষমতা দখলে বিশ্বাসী ছিলেন। মার্কসবাদীদের মতানুসারে অহিংস সত্যগ্রহের মাধ্যমে বুর্জোয়া শক্তিকে ক্ষমতাচ্যুত করা এবং ক্ষমতা দখল করা অসম্ভব। মার্কসবাদীরা শ্রেণী-সংগ্রামের তত্ত্বে বিশ্বাসী। আবেদন-নিবেদন বা অহিংস আন্দোলনের মাধ্যমে কোথাও শাসনব্যবস্থার পরিবর্তন হয় নি। এটা ঐতিহাসিক সত্য। গান্ধীজি কিন্তু বিপ্লবী আন্দোলন ও কর্মপন্থার বিরোধিতা করেছেন।

(৯) ধর্মীয় ও নৈতিকতার ভিত্তিতে গান্ধীজি তাঁর রাষ্ট্রচিন্তাকে প্রতিষ্ঠিত করেছেন। ধর্ম ও নৈতিকতার উপর মাত্রাতিরিক্ত গুরুত্ব আরোপ করার ফলে গান্ধীজির রাষ্ট্রচিন্তায় বাস্তব অবস্থা উপেক্ষিত হয়েছে। এই সমস্ত কারণে সমালোচকদের অন্যতম অভিযোগ হল যে, গান্ধীজির রাজনৈতিক চিন্তা অত্যন্ত অস্পষ্ট।

উপরিউক্ত বিরূপ সমালোচনা সত্ত্বেও গান্ধীজির অনন্য রাষ্ট্রচিন্তার গুরুত্ব অনস্বীকার্য। তাঁর রাষ্ট্রদর্শন নিপীড়িত মানুষের মুক্তি-চিন্তার দ্বারা বিশেষভাবে প্রভাবিত হয়েছে। বর্তমানে তাঁর পঞ্চায়েতীরাজ ব্যবস্থার তাৎপর্য ও গুরুত্ব তত্ত্বগতভাবেও বাস্তবে সর্বজনস্বীকৃত। গণতান্ত্রিক শাসনের সূচু বাস্তবায়ন, গ্রামবাসীদের সামাজিক ও রাষ্ট্রনৈতিক চেতনাবৃদ্ধি, উপসংহার

পরিচ্ছন্ন গ্রামীণ প্রশাসন প্রতিষ্ঠা প্রভৃতি কারণে পঞ্চায়েত ব্যবস্থার গুরুত্ব আজ আর অস্বীকার করা যায় না। তা ছাড়া বুনিয়াদী শিক্ষা-ব্যবস্থা, কুটিরশিল্প এবং শ্রম-নিবিড় উৎপাদন পদ্ধতির তাৎপর্য চিন্তাবিদদের মধ্যে সমাদর লাভ করেছে। ভারতের সামাজিক, রাজনৈতিক এবং অর্থনৈতিক ক্ষেত্রে গান্ধী দর্শনের উল্লেখযোগ্য উপাদানগুলিকে প্রয়োগ ও সংরক্ষণের প্রচেষ্টা পরিলক্ষিত হয়। বর্তমানে ভারতীয় যুক্তরাষ্ট্রের বিভিন্ন প্রদেশে পঞ্চায়েতীরাজ-

ব্যবস্থা প্রতিষ্ঠিত হয়েছে। তাছাড়া বেকার সমস্যা-জর্জরিত ভারতে কুটির শিল্প এবং শ্রম-নিবিড় উৎপাদন পদ্ধতির তাৎপর্য অস্বীকার করা যায় না।

৪.৮. রাষ্ট্র সম্পর্কে মার্কসীয় দৃষ্টিভঙ্গি ও গান্ধীজির দৃষ্টিভঙ্গির পার্থক্য (Difference between Marxian outlook and Gandhiji's outlook regarding the state)

গান্ধীজির রাষ্ট্রচিন্তার বিভিন্ন দিকগুলি পর্যালোচনা করলে মার্কসীয় দর্শনের কিছু কিছু বিষয়ের সঙ্গে আপাত সাদৃশ্য দেখা যায়। এরই ভিত্তিতে অনেকে মনে করেন যে, মার্কসবাদের সঙ্গে গান্ধীজির দৃষ্টিভঙ্গির মৌলিক সাদৃশ্য রয়েছে। সাদৃশ্যমূলক আলোচনা প্রসঙ্গে এঁরা বলেন যে মহাত্মা গান্ধী ও মার্কস উভয়েই রাষ্ট্রবিহীন সমাজ প্রতিষ্ঠার কথা বলেছেন। রাষ্ট্রের প্রকৃতি প্রসঙ্গে উভয়েরই মত হল যে, রাষ্ট্র একটি শোষণমূলক প্রতিষ্ঠান এবং বলপ্রয়োগের মাধ্যমে রাষ্ট্র কাজ করে। তবে মার্কসবাদ ও গান্ধীজির দর্শনের মধ্যে এই ধরনের সাদৃশ্যমূলক আলোচনা অসঙ্গত ও বিভ্রান্তিকর। বস্তুত দৃষ্টিভঙ্গি ও পদ্ধতিগত বিষয়ে মার্কসবাদ ও গান্ধীজির রাষ্ট্রচিন্তার মধ্যে পার্থক্য বর্তমান।

(১) গান্ধীজির রাষ্ট্রচিন্তা মূলত ধর্ম ও নৈতিকতার দ্বারা প্রভাবিত ও পরিচালিত হয়েছে। ধর্মীয় ও নৈতিক দৃষ্টিভঙ্গি থেকেই তিনি রাষ্ট্রনৈতিক সমস্যাগুলির বিচার-বিশ্লেষণ করেছেন। কিন্তু এক্ষেত্রে মার্কসীয় দৃষ্টিভঙ্গি হল ঐতিহাসিক বস্তুবাদী। ঐতিহাসিক বস্তুবাদের দৃষ্টিভঙ্গি থেকেই মার্কস সামাজিক ও রাষ্ট্রনৈতিক সমস্যাগুলির বিচার-বিশ্লেষণ করেছেন।

(২) রাষ্ট্রের প্রকৃতি প্রসঙ্গে গান্ধীজি ও মার্কসের দৃষ্টিভঙ্গির মধ্যে পার্থক্য আছে। মার্কসবাদ অনুসারে রাষ্ট্র হল শ্রেণী-শোষণ ও শ্রেণী-শাসনের হাতিয়ার বিশেষ। মার্কসীয় দৃষ্টিতে শ্রেণীগত দৃষ্টিভঙ্গি থেকে রাষ্ট্র সম্পর্কে আলোচনা করা হয়। কিন্তু রাষ্ট্রের শ্রেণী-চরিত্রকে গান্ধীজি উপেক্ষা করেছেন। রাষ্ট্র শ্রেণীস্বার্থের ধারক ও বাহক হিসাবে কাজ করে। গান্ধীজি তা মনে করেন না।

(৩) মার্কসবাদে সর্বস্বতার বিপ্লবের অপরিহার্যতার কথা বলা হয়। কারণ হিসাবে বলা হয় যে, বুর্জোয়া শ্রেণী কখনই নিজের থেকে রাষ্ট্রীয় ক্ষমতা সর্বস্বরা শ্রেণীকে দেবে না। তাই বলপ্রয়োগের মাধ্যমে সর্বস্বরা শ্রেণীকে রাষ্ট্রীয় ক্ষমতা দখল করতে হবে। অর্থাৎ সর্বস্বতার বিপ্লব অপরিহার্য। কিন্তু গান্ধীজির মতানুসারে বলপ্রয়োগ বা বিপ্লব গণতান্ত্রিক আদর্শের বিরোধী। তাঁর মতানুসারে বলপ্রয়োগের মাধ্যমে ক্ষমতা দখল অনৈতিক ও অন্যায়। গান্ধীজি অহিংস সংগ্রামের উপর জোর দিয়েছেন। তাঁর মতে এই অহিংস উপায়ের মাধ্যমে কাম্য পরিবর্তন সম্ভব।

(৪) মার্কসীয় দর্শনের দু'টি বড় সূত্র হল : 'সর্বস্বতার একনায়কত্ব' (Dictatorship of the Proletariat) এবং 'রাষ্ট্রের অবলুপ্তি' (withering away of the state)। মার্কসবাদ অনুসারে বিপ্লবের মাধ্যমে বুর্জোয়া রাষ্ট্রের জায়গায় সর্বস্বতার একনায়কত্ব প্রতিষ্ঠিত হবে। তারপর শ্রেণীহীন ও শোষণহীন সাম্যবাদী সমাজ প্রতিষ্ঠিত হলে শ্রেণীশোষণের যন্ত্র রাষ্ট্র অপ্রয়োজনীয় হয়ে আপনা থেকে উবে যাবে। মহাত্মা গান্ধী কিন্তু 'সর্বস্বতার একনায়কত্ব' ও 'রাষ্ট্রের অবলুপ্তি' তত্ত্বকে স্বীকার করেন নি। তিনি রাষ্ট্রীয় সংগঠনের রূপ হিসাবে সত্যগ্রহী গ্রামসমূহের সমবায়ের কথা বলেছেন।

প্রকৃত প্রস্তাবে মার্কসবাদী দৃষ্টিভঙ্গির ও গান্ধীবাদী দৃষ্টিভঙ্গির মধ্যে সাদৃশ্যের অনুসন্ধান নিতান্তই অর্থহীন। উভয় দৃষ্টিভঙ্গির মধ্যে মৌলিক পার্থক্য বর্তমান।

৪.৯. স্বরাজ সম্পর্কিত গান্ধীজির ধারণা (Gandhi's Concept of Swaraj)

ব্যুৎপত্তিগত অর্থে স্বরাজ বলতে আত্মশাসন বা আত্মনিয়ন্ত্রণকে বোঝায়। কিন্তু মহাত্মা গান্ধীর মতাদর্শে স্বরাজ সম্পর্কিত ধারণা অধিকতর অর্থবহ। গান্ধী-দর্শনে স্বরাজ সম্পর্কিত সাধারণ অর্থ ধারণার ব্যঞ্জনা বিশেষভাবে ব্যাপক। প্রাথমিকভাবে স্বরাজ বলতে পরাধীনতার শৃঙ্খল থেকে জাতির মুক্তিকে বোঝায়। ভারতবর্ষের পরিপ্রেক্ষিতে স্বরাজ হল বিদেশী ব্রিটিশ শাসনের অবসান। সমকালীন ভারতের জাতীয়তাবাদী বিশিষ্ট নেতা বালগঙ্গাধর তিলক উচ্চকণ্ঠে ঘোষণা করেছিলেন যে, 'স্বরাজ হল আমাদের জন্মগত অধিকার'। এই স্লোগান ভারতবাসীর মনে উল্লেখযোগ্য উন্মাদনার সৃষ্টি করেছে।

মহাত্মা গান্ধীর স্বরাজ সম্পর্কিত সমগ্র ধারণা বিশেষ একটি বিষয়ের উপর প্রতিষ্ঠিত। এই বিষয়টি হল অহিংসা ও সত্যাগ্রহের পথে স্বাধীনতা অর্জন। স্বরাজের ধারণা ব্যাখ্যা প্রসঙ্গে গান্ধীজি বলেছেন সম্ভব হলে ব্রিটিশ সাম্রাজ্যের মধ্যে স্বাধীনতা লাভ এবং প্রয়োজন হলে এর বাইরে স্বাধীনতা অর্জন। তিনি বিদেশী শাসনকে শয়তানিপূর্ণ বলে সুস্পষ্টভাবে সমালোচনা করেছেন। আবার ভারতের স্বাধীনতা ও ব্রিটিশ সাম্রাজ্যের মধ্যে শান্তিপূর্ণ মীমাংসা বা সহাবস্থানের ব্যাপারেও তাঁর সম্মতিসূচক অনুমোদন ছিল। বস্তুত ভারতের স্বাধীনতার জন্য জাতীয়তাবাদী আন্দোলন পরিচালিত হওয়ার প্রাক্কালে 'স্বরাজ' শব্দটি বহুলভাবে ব্যবহৃত হত। স্বাধীনতা সংগ্রামের জাতীয়তাবাদী ভারতীয় নেতারা প্রায়শই 'স্বরাজ' কথাটি প্রয়োগ করতেন। কিন্তু

ধারণাগত অস্পষ্টতা 'স্বরাজ' কথাটির সর্ববিধ ব্যঞ্জনা সম্পর্কে সকলে সম্যকভাবে ওয়াকিবহাল ছিলেন না। এই সময় গান্ধীজিও 'স্বরাজ'-এর সম্পূর্ণ অর্থ সুস্পষ্টভাবে ব্যাখ্যা করে বলেন নি। অনেকের অভিমত অনুসারে অর্থের অস্পষ্টতা বা ব্যঞ্জনার দ্ব্যর্থতার কারণেই সুচিন্তিতভাবেই স্বরাজ শব্দটি গ্রহণ করা হয়েছে। এই শব্দটির দ্বারা ব্রিটিশ শাসনের সম্পূর্ণ অবসান বা ভারত ও ভারতবাসীর সম্পূর্ণ স্বাধীনতার কথা বলা হয় নি। এই শব্দটির দ্বারা ব্রিটিশ কমনওয়েলথের ভিতরে থেকে বা এই সংগঠনের বাইরে গিয়ে স্বাধীনতার কথা বোঝান যেত। মহাত্মা গান্ধী স্বরাজ সম্পর্কে বলতে গিয়ে বলেছেন : "It (Swaraj) means a state such that we can maintain our separate existence without the presence of the English. If it is to be a partnership, it must be a partnership at will." পণ্ডিত জওহরলাল নেহরু তাঁর আত্মজীবনীতে 'স্বরাজ' শব্দটির ধারণাগত অস্পষ্টতা সম্পর্কে আলোচনা করেছেন। তাঁর মতানুসারে অধিকাংশ ভারতীয় জননেতা স্বরাজ বলতে পরিপূর্ণ স্বাধীনতার থেকে কম কিছুকে বুঝতেন। গান্ধীজিও বিষয়টিকে আগাগোড়া অস্পষ্ট রেখে গেছেন। স্বরাজ-এর ধারণাটিকে তিনি কখনই সুস্পষ্টভাবে ব্যাখ্যা-বিশ্লেষণ করেন নি। পণ্ডিত নেহরু বলেছেন : "It was obvious that to most of our leaders Swaraj meant something much less than independence. Gandhiji was dilightfully vague on the subject and he did not encourage clear thinking about it either."

মহাত্মা গান্ধী অধিকতর উন্নত মানের 'হোমরুল' উদ্ভাবনের ব্যাপারে উদ্যোগী হয়েছিলেন। তিনি গ্রাম-সমাজের 'হোমরুল' বা স্বরাজকেই অধিকতর পরিপূর্ণভাবে ফিরিয়ে আনার পক্ষপাতী ছিলেন। তাঁর অভিমত অনুযায়ী গ্রাম-সমাজের উপর অভিশপ্ত পশ্চিমী আধুনিক সভ্যতার প্রভাব পড়ে নি। মহাত্মা গান্ধীর মতানুসারে স্বরাজ বলতে ভারতে ব্রিটেনের রাজনীতিক কাঠামোকে আমদানি করাকে বোঝায় না। 'হিন্দ স্বরাজ'-এর মধ্যে গান্ধীজির স্বরাজ সম্পর্কিত ধারণা নিহিত আছে। মহাত্মার মতানুসারে বস্তুগত সুখ লাভ বা ক্ষমতার হস্তান্তর 'হিন্দ স্বরাজ' নয়। 'সকলে না পাওয়া পর্যন্ত আমরাও নেব না'—এই চেতনা আমাদের মধ্যে এলে স্বরাজ আসবে। সকলের জন্য সকলের সমাজ হল স্বরাজ। এই সমাজে জাত-অজাত, সক্ষম-অক্ষম, ধনী-নির্ধন এ রকম কোন ভেদাভেদ থাকবে না। গ্রাম

স্বরাজের আদর্শ স্থাপনের স্বার্থে জরুরী হল আত্মনির্ভরশীল অর্থনীতি, দারিদ্র্য দূরীকরণ, সকলের কর্মসংস্থান প্রভৃতি। এই উদ্দেশ্যে উপনীত হওয়ার জন্য বিকেন্দ্রীভূত অর্থনীতি, দেশীয় শিল্পের পৃষ্ঠপোষকতা প্রভৃতি আবশ্যিক। তা হলে দেশের উন্নতি সাধনে দেশবাসীর সামর্থ্য, গুণগত যোগ্যতা ও কর্তব্যনিষ্ঠার বিকাশ ঘটবে। হিন্দুর রাজত্ব হিন্দু স্বরাজ নয়। এ হল ন্যায়ের রাজত্ব, সকলের রাজ্য। এই স্বরাজের উদ্দেশ্য হল বৈদেশিক শাসনের অপসারণ, নৈতিকতার বিকাশ ও বিস্তার, পূর্ণ আর্থনৈতিক সহযোগিতা, সামাজিকতা প্রভৃতি। তবে কিছু সংখ্যক মানুষ ক্ষমতার অধিকারী হলে তাকে স্বরাজ বলা যায় না। ক্ষমতার অপব্যবহার প্রতিরোধে প্রতিটি মানুষের সামর্থ্য থাকা দরকার। তবেই স্বরাজের সৃষ্টি হতে পারে।

মহাত্মা গান্ধীর স্বরাজ সম্পর্কিত ধারণার মধ্যে অধিবিদ্যক অর্থও নিহিত আছে। স্বরাজ হল এক আদর্শ সমাজে মানবজীবনের এক কাল্পনিক অবস্থা। এই অবস্থায় ক্ষমতার অপব্যবহার রোধে প্রত্যেক মানুষের সামর্থ্য থাকবে। স্বরাজ নিছক একটি রাজনীতিক বা আর্থনৈতিক স্বরাজ ও রামরাজ্য

আদর্শ নয়। এ হল নৈতিক শক্তি-সামর্থ্যের অভিব্যক্তি। স্বরাজ হল এক সুশৃঙ্খল সামাজিক অবস্থা। এর মধ্যে অহংবোধের বা ব্যক্তিগত স্বার্থের সংকীর্ণতা থাকবে না। কারণ অহংবোধের সংকীর্ণতাই সমাজে সংঘাত ও উত্তেজনাপূর্ণ বিবাদ-বিসংবাদের সৃষ্টি করে। পরিপূর্ণ সামাজিক সাম্য, স্বাধীনতা ও ন্যায়বিচারের রাজত্বই হল স্বরাজ। এ দিক থেকে বিচার করলে গান্ধীজির স্বরাজ হল বহুলাংশে রামরাজ্যের সমগোত্রীয় বা সমার্থক। স্বরাজেরই পরিপূর্ণ পরিণতি হল রামরাজ্য। জনসাধারণের স্বরাজ হল রামরাজ্য ; স্বরাজের চূড়ান্ত লক্ষ্য হল রামরাজ্য। রামরাজ্য হল অহিংসাত্মক স্বরাজ, রামরাজ্য হল ধর্মের রাজত্ব।